

敬業堂詩集

函一

十

冊

敬業堂詩集卷四

海寧

查慎行

悔餘

遄歸集

起壬戌五月
盡癸亥九月

客揚中丞幕下且三年德尹以壬戌正月北游余
在黔聞之遂束裝遄返與季弟潤木局促里居甫
周一歲不及待仲歸又將出而丐於親舊矣合歸
途所作及家居詩共成一卷名曰遄歸集

發貴陽留別大中丞楊公三首

風波纔過又烽烟一路看山漸近滇浪跡南雲真萬里
濫竽東郭忽三年孤熊舐掌粗知分飛鳥依人正自憐
不覺對公成洒涕也應容我賦歸田

荷葉堂詩集卷四
鄉社扮揄隔後塵交情翻借布衣親勒銘事大才難稱
絕代人稀見始真寶匣異光刀剖玉銅盤高燄燭輝銀
他時重話西征績慚愧曾充幕下賓
紛紛桃李艷公門鴛鴦如余尚服轅明鏡何私顏欲換
清談無用蝨空捫人來江左名慚項詩和春陵格紀元
束縛倘酬知己分敢隨流俗說啣恩

高寨

綠蕨荒無際黃茅直到天祇因鄉路遠猶自惱啼鶻

度雲頂關

目極雲生處到來雲滿身時清存畏路興盡有歸人馬
力疲堪惜禽言聽似真往來經戰地白日起陰燐

將至清平縣馬上作

石秀山漸佳城荒日將暮遙見孤烟生猶知有人住

晚宿龍里縣署

官舍周圍帶土墻盆池新漲接方塘歸人已夢田廬好
只道蛙聲是水鄉

母豬洞觀瀑

蠻中六月交山路苦焚爇臥聞夜雨來快起尋乳穴入
洞微有聲足底響嗚咽出山忽震怒閃睽不容掣巖前
漚奔流人駭馬辟易來如曳組練一綫注飛白跌為淵
潭深湛湛落澄碧石牙互參錯吞吐霹靂舌直從灣環
底跳沫騰百尺慘慘天變容凜凜風作雪岡頭杜宇叫

萬竹劃然裂將歸得竒觀頓頓解肺肝渴

冷溪

溪渾三尺雨馬渡一汀烟徑轉長防虎沙平忽有田斷
雲依岫險亂草得花妍滿眼悲涼意新詩記不全

平越遇雷玉衡索留別之句口占贈之

依舊青衫把一鞭紛紛白面看談邊冷官未了從軍志
岐路猶餘話別緣急雨淋浪茅店外亂山高下馬蹄前
得歸吾已無餘恨只欠游蹤未到滇

雷滇人也

黎峨城北福泉山張三丰禮斗亭尚存

清池照影樹扶疎

亭前有浴仙池長生桂

晝靜廊空想步虛閱世

人來棋散後出山雲澹雨晴初窮塵滾滾孤亭在浩劫

茫茫百戰餘華表鶴歸應有泪舊時城郭半丘墟

題興隆衛聖母閣

隔斷荒城別一丘蟬聲寂歷鳥鈎輶忽來風雨疑無暑
如此林巒合有樓塵刹留僧還竿奕瘴鄉有路莫回頭
澹忘未必同靈運直為清暉作少留

寓樓晚坐

一聲清磬出柴關庵主軍持乞米還暝色群群栖樹鳥
夕陽朶朶隔城山

偏橋田家行

結茅住山顛種田在山麓田荒費牛力僅得播種穀七
年際離亂饑饉死相屬稍思歲一稔生命絲或續師旅

比凱旋驕嘶百萬足黔山無水草何以充苜蓿成群走
阡陌泥淖沒馬腹食葉躡其根螟螣等荼毒秣芻一朝
盡婦子終歲哭天下自昇平民生有踏跼我爲老農語
物理視反覆來年期好收重看秧田綠

晚登偏橋玄都觀後閣

承平推舊鎮設險控西南水勢全趨楚山形尚帶黔壤
城平似掌古觀廢成庵即事多興廢兵戈實厭談

重宿澠陽中山寺贈紫橋長老

水色山光淨眼前下臨無地有蒼烟長虹自亘西來路
峭壁剛支北面天開士偶逢堪一咲舊游重到已經年
亂離風景勞生夢可少秋堂借榻眠

舟發沙灣入沅州境

烟村紅日吐初晴野泊舸艚促早程秋水澄鮮魚味美
曉山葱蒨鳥言清城連槃瓠形猶壯灘過鸕鷀怒未平
我是沅南留滯客舊游一一總關情

天星灘

明星的的吐飛湍石勢參差亂眼看莫擬乘槎到天外
偶從竒險博竒觀

神堂灣村家

布裙翩翩短幅高髻亭亭古粧望看人成翁媪不知世
有姬姜

辰溪縣晚泊

夕陽孤塔表辰溪江面初寬地漸低從此一舟平似掌
萬峰回首夜郎西

瀘溪

傍穴纍纍架樹梢懸崖百丈俯江均小舟恰傍山根過
長恐風狂隴鳥巢

兩頭纖纖曲二首

兩頭纖纖舫子船送郎只到洞庭邊四時雪浪灘前石
白日雷霆枕底天

兩頭纖纖月上弦中秋屈指又今年歸路二三千里近
別家四十一回圓

晚過界亭

晚景融怡剪渡還
鳧鷖隨我過前灣
半江風色參差浪
臥聽猿啼夾岸山

桃源訪胡孔志不值

漢陽分袂已多年
聞說遊蹤久入燕
歸路我經秦客峒
故人貧就廣文壇
棗麻舊俗今誰主
苜蓿荒齋醉少緣
秋雨暮帆惆悵在
可堪回首洞庭烟

沅江縣治濱湖居民皆漁戶水盛時舉家乘舟
入湖秋冬水縮則結茅沿岸住

官舍無城傍水濱
鵝鵲鴨半居民疎
燈幾點夜呼渡
老屋百家秋結隣
岸曲蘆深長響雨
船頭魚健欲驚人
饒他小縣輸漁課
賦斂湖湘俗久貧

將之長沙留別沈將雲

武陵溪口手重揮，獨向長沙未得歸。
憑寄家書傳客況，爲言弱羽又分飛。

青草湖

淼淼湖光天盡頭，矇矓初日起蘆洲。
小船百折行難到，一片蒼雲白露秋。

長沙舟次聞德尹入黔之信二首

去年此地君思我，君到黔中我又歸。
世路茫茫誰料得，離人黯黯意多違。
兩萍湖海原難遇，獨雁瀟湘正嬾飛。
此夜夢回姜被冷，殘燭疎雨倍依依。

岐路匆匆過朗州

弟去常德纔五日而余至

菊花初約誤林丘，音塵

京國書遲達詩草炎荒客善愁道路半年成萬里

德尹于正

月自故鄉入都今又來黔故云

江湖一信到孤舟跼鵝浪泊來何為歸

去吾方羨少游

長沙喜遇彭南陔

鷺立蘆花淺水蠅肥稻壟新霜夢去故鄉秋好一尊閒

話瀟湘

長沙雜感四首

水遠山平極望賒湖南風物一長嗟屈原已去終亡國

吳芮如存可世家湘竹舊痕啼夢雨薜蘿新鬼怨囊沙

孤城自繞殘陽岸風急秋清急暮笳

觥角關山百戰過征南精銳竟如何牛羊隊逐移營盡

犀兕人傳棄甲多蜀虎連年勞
悵望黔驢無技任譏訶
孟明一青功無敵別路今聽唱凱歌

窮年供億奈兵荒穀賤傷農力
莫償地遠舟車還絡繹
時清圖繪有流亡勞魚未必忘
煦沫集鴈何當穩稻粱
十萬人家君勿問如今瘠土是三湘

早濕南遷事可哀鬼神宣室召
空回君臣如此猶嗟命
絳灌何人乃忌才史漢高文光
照耀江山故宅客徘徊
治安敢擬長沙策直為先生痛哭來

同南陔九畹遊嶽麓中途遇雨興盡而返

緗帙曾披北海碑南游雅與素心期
好奇歷險人皆笑
冒雨尋山興又癡雙屐泥痕苔剝落
一江帆影浪參差

衡山咫尺猶難到敢望雲開似退之

八月十四夜洞庭舟中風雨再寄德尹黔南

扁舟小泊最蒼涼那更回頭望夜郎浪跡久經烟瘴地
懷人今在水雲鄉燈紅極浦秋何際月黑寥天夜有光
滿眼江湖飛不到始憐羽短道途長

洞庭阻風歌

湘陰去岳陽湖固一日程雲從北來風色惡吾力敢與
吾命爭船頭紙錢撒白雨舟子酬神致私語老鴉啄肉
掠水飛廟祝鳴鐘月東吐大哉神靈本至公憑私詎可
祈感通不如繫船整篷索南北東西預難度明朝風便
從爾行莫使有風帆力弱

中秋夜洞庭對月歌

長風霾雲莽千里雲氣蓬蓬天冒水風收雲散波乍平
倒轉青天作湖底初看落日沈波紅素月欲升天斂容
舟人回首盡東望吞吐故在馮夸宮須臾忽自波心上
鏡面橫開十餘丈月光浸水水浸天一派空明互迴盪
此時驪龍潛竄深目炫不得銜珠吟巨魚無知作騰蹕
鱗甲一動千黃金人間此境知難必快意翻從偶然得
遙聞漁父唱歌來始覺中秋是今夕

湘江舟晚

清湘清徹底人影淨征衫秋水漸歸汜遠舟惟見帆荒
洲無雁到落日被龍銜一樣天邊月今宵迥不凡

岳州

湖腹平吞爾許貪湖唇一噴勢難拊力爭全楚功誰託
識應孤城戶已三客夢堠長還堠短夕陽山北又山南
太平設險非無意漁獵丸泥敢尚探

湖中盜賊
充斥故云

赤壁

一戰三分定英雄洵有神古今才不偶天地局長新故
壘秋吹角荒江晚問津祭風臺下路惆悵是歸人

夜宿簾洲驛

洞庭晨出險小驛宿兼程漁火遠村沒雁沙殘月明
荇荒大澤賦歛窘餘生不敢論時事乾坤及罷兵

過湖口作

楚水吳烟一覽收
新移鎖鑰控中流
誰興棄孔緡錢利
盡算江湖大小舟
山脚酒旗孤店晚
縣南風色亂帆秋
詩囊壓擔琴扶膝
關吏何妨咲薄游

登蕪湖浮圖

落帽家山記幾巡
弟兄南北各傷神
茱萸明日重陽酒

五處登高各一人

時家次谷在粵荆州在燕德尹在黔惟韜萊家居故云

木末亭謁方文正景忠烈兩公祠

一姓興亡際
忠臣尚力爭
百年公論定
兩字易名成
山雨晴蒸氣
江雷怒作聲
君看南渡後
降表出書生

發儀真

綠楊城郭碧蘿洲
夾岸紅燈映酒樓
爲愛吳船聽軟語

買帆連夜下真州

欲登金山不果

也有登山興中流去不多眼中江路盡翻覺畏風波

梁溪秋晚

繞郭林塘淨晚烟放閒黃犢水平田吳霜未剪江南綠
猶有菱歌動斂舷

初到家得陳六謙書并見寄詩二章期余作北

游馳聲以報

睽違不在久依依念禱侶與子惜分陰矧乃遞寒暑六
年五寄書故人在肺腑才華我何有藻賞終見許久要
期勿負感子心獨苦師門一回首過眼如風雨初約貧

漸渝旁觀惜毛羽青衫行謁選此意吾諒汝昂藏七尺
軀行與衰老伍忿忿簿領下英氣恐少沮并州地苦寒
臘盡雪片舞蹇驢數十驛遠宦等羈旅此邦經五季地
險全用武連延二千年往往警鞞鼓海內今連兵闖粵
接秦楚河東耕鑿安天道合存撫安邑古帝墟唐俗仍
樸魯官清資俸薄折柬到鄉土也擬上羊腸得君作賢
主

哭王右朝四首

還家約略中秋後長路風波恨稍遲六日不詹君尚望
三年重到我成悲魂來蘋末蛟龍駭泪殺燈花枕席知
恠得吳江催噩夢喚迴孤帳雨飄絲

九月十二夜舟泊
吳江夢中忽有人

大呼曰三日內汝當有奇禍一時
驚寤明日到家遂聞兄重陽訃信

卅載交親氣誼中益棺事了太匆匆擬從頽俗存家法
不願諸甥有舅風冰雪一枝憐抱鵲圖書四壁哽秋蟲
東山便是西州路欲學羊曇計轉窮

勿論死別與生離存歿心傷無盡期鮑叔有情貧敢諱
尚平多累出偏遲向來語笑猶堪憶從此肝腸好付誰
海角天南諸弟散訃音欲寄苦差池

未改頭銜屬望虛手題丹旆又躊躇携來萬里千行泪

檢得三年五度書

余出門以後
兄凡五寄書

好事誰還評月旦餘生

吾久負居諸文壇詩社飛揚氣百念俱灰一慟餘

除夕與潤木分韻二首

曾爲茆堂乞少資不成覓地向西枝弟兄蹤跡團團少
兒女心情指顧移扣角騎牛聊復爾設置守兔定何爲
升沈此際知誰是欲悔身謀又自疑
燈花檐雨夜沈沈懨我淪飄得故林久別翻驚相對影
急裝誰諒倦游心時清壯士才難盡俗薄貧交望苦深
稍喜來年春帶閨未應相對廢聯吟

不見外舅陸射山先生屈指六年今春奉謁里

門旋有吳行兼以送別二首

以下癸亥作

鬢霜髯雪走天涯拂袖歸來記歲華海內詩文無手敵
座中筋力許誰誇談深世態多經眼老喜遊踪漸近家
五柳有情難繫別勿論鄉思米囊花

亂餘三徑長蓬蒿栗里田荒尚屬陶逸興人扶雙屐健
名山天靳一星高春濃遠市紅燈月烟泛輕帆白鷺濤
恠底尊前還戀戀六年書疏阻江臯

重過聽鶯齋與徐淮江話舊

風雨高齋別幾春小池佳樹碧添鱗兩湖地主憐君在
三月鶯花笑客頻夢裏何曾忘對榻畫中只合著閒人
倦游莫訝歸心切知己無如穉子真

三月晦日陳元亮家看海棠

一番陰雨花期盡難得君家尚有春路隔西川無好句
眼明南郭又芳辰濃雲薄霧憐香意翠袖紅紗絕代人
還有掛帆惆悵在滿湖烟水夢何因

與顯武別有約而未遂故云

傳經堂歌卓次厚屬賦

後生學術無授受往往談天哆衍口春華秋實古難兼
氣節文章誰不朽塘西卓氏本望族遜國名臣侍郎後
天教一姓留典型幾輩蟬聯起諸叟西京篋衍探源委
北宋儒林辨誰某煌煌藜火燃太乙種種琅函發大酉
雕龍餘技矢穿楊石鼓舊文魚貫柳一經三世屬名家
兩字千秋推作手頗聞名儒後必大賢嗣文孫洵非偶
百年椽桷尚如新別築祠堂寬十畝已看歌頌美輪奐
更蒔花竹貽長久藏經閣闕曉繡書族譜亭成夜呼酒
才名後先滿南國不比虛名拍箕斗余家盈盈隔帶水
累世交情誼稱厚三十年前枯菀分家運迤邐溝陽九

鄴籤兵火蕩餘劫陶逕柴桑慚世守老成頓盡人所嘆
小子無承良自醜竭來塵盞逐游惰筆墨祇用供奔走
祖父遺書讀未成冑堂冑構夫何有詩成對君三太息
獨抱殘經莽回首

同淮江登東湖弄珠樓

但令興到便移船我得同游亦偶然疎磬晚潮孤影墮
暖雲濃樹四垂天稱心圖畫憑欄外經眼亭臺落照前
却笑詩成無傑句驪龍依舊抱珠眠

過吳漢槎禾城寓樓

快事相看一笑真忽傳絕域有歸人劫灰已掃文星燦
黨禁初寬士氣伸佳客偶逢如有約

時陳寄齋俞大文俱在座盛名

長恐見無因廿年冰雪思鄉夢纔向田園過一春

漢槎將携

燕家入

吳門喜晤梁藥亭

僕家海東君海南海道相距三千三有時憶君發遐想

直欲芒屨遊瓊儋故人

謂魏禹平

金閫傳好語知是久客猶

停驂買帆兩日風色順百花洲外波潭潭風塵在顏刺

銜袖咲口一豁心俱甘披襟更覺有深致黃鬚綠鬢垂

鬢鬢名言霏微齒牙潔絕勝香味飄迦楠小儒窘步不

踰閫訓話馴繞如衣蟬讀書已破十萬卷可使蹤跡無

窮探吳中此來凡兩度一一紗壁留精藍山塘四月天

氣好輕衫拂領來晴嵐家家綠陰轉黃鳥曷不載酒携

雙柑閉門却掃吟獨苦郢雪屬和何人堪平生美好百
不入正坐好古成竒貪知君力欲追正始三唐兩宋須
互參皮毛洗盡血性在願及有志深廟勘拙詩與君不
同調小言未可誇詹詹數篇見賞自京洛君愈降氣余
彌慚匆匆人事促輕別欲去暫止嘆清談紅綿花開鷓
鴒叫歸夢定繞枕柳庵

聲山姪自都下歸相見闔門舟次出荊州兄手

札期余北游戲作一詩以答

春冰一騎蹴滹沱柳色蘇臺握手過鹵莽不須慚計拙
驅馳真欲悔才多吟紅日晏誰同調變徵聲移急和歌
每遇南轅頻問訊長安米價近如何

同祝豹臣及家西莓叔飲韜荒兄齋

高樹柴門景又遷小堂南北綠遮天偶然不速來三客
如此相思閱五年居近人應疑卜晝路難吾轉愛歸田
棟花風急村橋暮欲散閒愁仗酒顛

養蠶行

去年收絲利倍三村中家家貪養蠶蠶多桑少葉騰貴
千錢一筐賣未甘溫風吹蠶蠶易老滿箔三眠上山早
蠶娘一月不梳頭懶惰却輸辛苦好東家採得繭如脂
繰向檐前索索吹西家繭頭薄於紙一樣蠶菜兩樣絲
將絲換錢索官串無者價昂有者賤貧家衣食天所慳
別許居奇營巧宦即今閩海尚與師爭利人人學賈兒

聞道樓船皆市舶，買絲豈必盡蚩蚩。

麥無秋行

三春雨多二麥荒，鬱卷盡萎田中央。
大麥莖長穗未起，小麥莖短葉早黃。
棟花風過縑車傍，憶得年時麥上場。
場乾日烈聲拍拍，作糜湯餅香腰鎌。
往刈纔盈尺，雉尾襍穢藏不得。
驚人角角渡水鳴，別向原頭草間活。
可憐鴉鵲不知時，群下荒疇覓餘粒。
我爲老農語鴉鵲，明年好收從爾食。
明年好收理則那，只愁無種將奈何。
西園書屋順治丙戌燬於火，瓦礫之場長蒼茨。
棘垂四十年，比方有事於墾闢。
既惜地力，且以習僮僕之勤焉。
用東坡七首韻，與潤木同作。

池亭剩曩其長養藜與蒿中更四十載未盡秣刺勞貧
家供賦斂尺寸無所逃焉能守石田鬱鬱希陰膏益利
興由人棄捐成不毛旬來拾瓦礫積比頽垣高

赤日黧我顏白汗沾我背鉏荒如去病快得三年艾伊
昔締構初春秋想高會滄桑變時局草土少完塊誰歌
蟋蟀詩蹶蹶職思外南山方朝濟厥象占蔚蒼百年雖
莫保三徑幸猶在給口茶蓼閒其甘等炙膾

生涯失習勞貴賤誰比數優游不堪事尚記前賢語主
人旣率先僮僕趾齊舉給餐稱勤惰功力積毫縷種豆
畦橫從種瓜架支柱所憂歲將旱六月竟無雨澮畝一
歉收何由載筐筥力惡不出身貨惡不出土尚恐機事

牽高人未全許

陶家有田園三徑忍就荒籬落缺粗補東西互相望叢
牙覆塊生一片蒼雲蒼地力久不効新萌必繁昌未飽
啄粟鴛先防踏蔬羊望腹聊忍饑先疇胡敢忘

土性既有宜人情亦有適養材待椅桐孰若樹榛栗移
根尋丈內本向鄰家乞落實庶可期拙謀作乃逸舉羸
力不逮何敢議築室灌園豈無人戢影勿輕出此中足
生事吾計今已必

惡木次第除丁丁響斤斲析薪析克荷生子願愚慙我

貧天所憐田舍免風電

用北史王蒙傳事

隨兪課晨夕老圃庶

可學先公垂訓在遠蹟企商嶽黽勉奉前編偏傍敢駁

犖勿言世業盡五畝澤已渥兄弟且同居相容在蝸角

用庾信小園賦中語

仲子性好遊旅食辭南村叔子嬾甘寢鼻息鳴西垣我
介兩者間竒士羞王孫有時事游惰挾瑟隨雍門有時
賦歸來及見松菊存行者咏陟岡居者勸加殮營身各
有役出處且勿論若較杜樊川季强慚令昆

杜牧望故園賦云昆

令季强兮鄉黨附

題朱子蓉六丈所藏張穆畫馬用黃山谷韻

綠楊風起驕不行低頭嚼環如有聲乾坤一線塵縱橫
肉中帶骨筆力透不比東郊詩咏瘦苦憶尋常棧間豆
青絲漫絡高家驄龍眠妙手亦老翁誰能更貌桃花紅

送唐殿宣之浦江學博任

琴書壓擔曉風清
別路山行復澗行
青髻功名秦博士
白頭經義魯諸生
月泉詩好篇篇秀
寶掌峰竒面面晴
勿對空枰嗟苜蓿
如今驥足是初程

同韜荒兄飲鄭春薦齋

雲巖醉別忽經春
重向吳山問主人
陶侃登堂還拜母
茅容爲具也留賓
迴風却扇渾無暑
急雨催詩若有神
鸚鵡莫誇才子賦
鄭家名擅鷓鴣新

坐側有鸚鵡
故戲及之

七夕同鶴江孝績序仔集淮江聽鶯齋

紅蓼蒼葭水一方
到門松桂已迎涼
燈前岐路天南北
時鶴江初從山右歸
屋角雙星夜短長
雅集幾回逢好

孝績又將遊江右

友離悰多半話他鄉當筵有客傷存歿不忍臨風發酒

狂思右朝也

次谷兄自粵西扶先伯父櫬歸里二首

萬里行何畏歸來始泣然亂離成子孝危苦得天憐
淚盡干戈外魂驚瘴癘邊路難經死地初不計生還

自古蒼梧道征人半舁棺種猿啼赤子父老賙清官
竟返天南魄翻疑夢裏看附書吾久望執手雜悲驩

彭南陔長沙寄書知其長郎越于已於去冬物

故一詩當哭兼以相慰

鵬賦長沙痛未窮短書緘泪寄西風隔年別酒征衣爛
幾日歸帆旅櫬同善病我曾憐久客未亡人又累衰翁

畏途盡室成何事頭白君應悔斷蓬

雨中過董靜思山居

十里沿洄暮靄昏熟衣天氣半清溫菰蒲響雨烟沈浦
蘆荻迴船水到門躍網忽驚魚尾健墜簷初見橋頭繁
好山偏阻登高屐笑指郎家半日村

題陳允文圮橋授書圖小影

戰鬪功輸運籌亞英雄勇退神仙舍誰招四皓出商山
我信留侯本儒者竒謨秘策乃天授老父一編事聊假
不然韜畧世所知豈必傳從圮橋下陳生爾意非好竒
那將此景供圖寫志大何妨學賢聖時清未許談王霸
披圖畧畧意何如傳習師門計有餘

余與允文俱出姚江先生之門眼

前經術皆經濟莫問人間未見書

同人中秋集陳寄齋宅

南游我昨逢佳節兩度中秋瘴如墨去年對酒洞庭湖
萬頃平波鋪練雪電光一瞬等閒過倏忽還家又今夕
良朋折柬邀共醉憐我匆匆復行色晚來微雨過城西
影落人衣月東出明河一洗秋容淨海氣天光較然劃
街頭無人市聲斂相國門前月尤白門前看月堂上歌
白月紅燈互相射繡屏屈膝圍嬌面赴節紅牙夜深拍
沈沈簫管索索絲微動梁塵隨猶澁清商一線徐引去
桂樹流颼葉初脫此時中庭月停午窈窕穿簾巧相覓
須臾腰鼓忽勾闌假面西涼群嘖嘖歡場冷落年數久

對此翻令感蕭瑟却憶江湖載酒時蘆花深岸聞吹笛
故人顏色就歸夢羽短途長莽飛越此來會合殆天幸
竿木逢塲看跳擲徵歌自笑膽氣粗起舞偏驚耳輪熱
東南盤敦君眼見供帳如雲掃無迹獨留好景付我曹
莫向瑤臺話塵陌只愁客散月易斜人事蒼茫難料得
來年作客知何地此地來年召何客南枝棲鵲催五更
東野寒蛩號四壁殷勤酌月還一杯珍重清光照離別

過曹希文齋

恠底移家忽入城小堂幽事頗關情琴牀近海潮添潤
茶榻分泉火就烹摩詰園亭依畫橐建安人物入詩評
也知習嬾便支戶不廢堦除有送迎

有感戲寄韜荒兄

格新曾被老元偷此外何堪說唱詠但到西園應秉燭

不逢東野肯低頭故交牛耳成孤憤棄婦蛾眉托四愁

指一邑子博得美人開口笑暫時跛足也風流兄以酒後傷足故戲及之

去夏余自黔東下與德尹相左於辰沅道中今

德尹嶺外將歸余又有西江之役二詩留寄

薄遊踪跡久沈吟準擬歸飛息故林別去無端隨末俗

窮來何事愜初心書籤日過塵窺隙茶竈風迴響和琴

一笑飄然仍作客竹窻閒殺是清陰

二頃田知戀洛陽眼中岐路等亡羊江風海雨愁頻結

桂樹荆花感又長草草歸程雙爪跡勞勞別夢五星霜

惟來出入如相避鄉國何時鴈作行

留別朱日觀祝豹臣朱與三陳寄齋王南屏家
西莓叔韜荒兄眷山姪二首

綠髻西風幾遍吹許巢貧過少年時

用方干詩中語好官氣色

車裘壯獨客心情故舊疑近月江雲偏絢采未霜淮柳
尚搖絲名場此日誰高步消得樊川贈別詩

渭城歌酒罽纏綿存歿關心一黯然落日故人長笛賦

右朝歿已一年

曉星同調斷鴻天夢回露白移橙候路入秋紅

剝棗邊任是登高何地好青帘那不憶羊川

西江集

起癸亥十月止甲子三月

萬里歸來繼逢儉歲家憲副伯方攝西江臬篆邀

余入署自冬涉春周旋六閱月爲治遊學之裝到
家五日北行不欲浮沈鄉曲傷長者之惠也

將有南昌之行示兒建

我年二十九足不出鄉閭南舟阻錢塘北轅限姑胥循
循守矩矱尺寸敢少渝汝祖見背日戊午暮春初銜恤
在終天有生不如無實擬奉成訓終身依墓廬黽勉罔
汝叔食蒿甘薺如此意難自保饑寒旋相驅初心忽中
變末俗誰諒余麻鞋走從軍凶服尚未除自傷越禮教
臨去還躊躇汝時年十二戀戀來牽袂汝母病在牀強
起縫衣襦爲我擇吉日勸我姑徐徐山林忍窮餓此事
古有諸奈何逐浪遊浪游計終迂我雖口不答含意鬱

未攄恐喪丈夫勇一笑起跨驢寇盜滿西南殺人棄土
首書生爾何恃急往不暫須輕命踏危疆鹵莽拚羈孤
雖無司馬才肯戀終軍繻近遯關西公憐才等璠璵留
我置幕府開誠使懷杼初來荊州城漸入西南隅蹉跎
戰爭地四載過隙駒憶自前年冬洞庭上雙魚吾叔又
捐館訃音傳豈虛蠻燈黯淡花相對慘不舒天低嘯哀
猿月黑號訓狐開書忍再讀百感併集枯上念兩先靈
窀穸未歸居下念汝曹長失學猶從渠告歸策始決寧
獨懷樵漁中丞知我真贈言借吹噓坐覺瘴癘掃清風
拂長途檢點篋中裝百金頗有餘束書戒行李觸熱我
僕痛故人灑陽守開館留籃輿不惜分俸錢寄歸慙妻

拏命窮氣方傲却去同揮鋤行行百餘日始得還菰蘆
夜半叩柴扉犬吠雞群呼門前五株樹綠槐間黃榆亂
葉落我前忽驚秋又徂入門拜靈几血淚交模糊舉頭
汝在旁依稀記形模汝弟急欲見喚起髮未梳見爺不
識面反走牽娘裾對之重泗涕存沒傷心俱別離經喪
亂泛若浮海覓得歸特天憐未歸敢自圖稍欣世業在
斷蓬復依株繞屋十畝園桑下可種蔬即此勤學圃貧
士有故吾都緣懶惰久力不任菑畬室人免交適官稅
多積逋倦羽又辭巢飄飄係洪都仲氏久去家南北音
塵疎季子資性矯青羶誤為儒齷齪小兒曹欸段下澤
車蟲蝦恣跳躍蝸涎活停瀦翻咲尺水艱蛟龍困泥塗

男兒誇富有豈在堆倉庾願汝勤孝弟餘事到讀書孝
弟乃本根根完花葉敷章句粗能通已勝耕田夫煌煌
京兆後子孫雜賢愚五世澤未斬有生夫豈徒不聞王
僧虔鳳凰綴蠟珠崢嶸覘頭角少小志本殊十五號成
童何況十六與當時同隊者轉眼分龍豬脊母學汝父
風塵厭微軀厲人恐似已取火夜看雛悔心用自警作
詩焉敢誣

輓呂晚村徵君

屠龍餘技到雕蟲賣藝文成事事工晚就人誰推入室
蚤哀君自合稱名才今漸少衣冠外名果難逃出處中
身後有書休論價也應少作愧揚雄

黃晦木先生從魏青城憲副乞買山資將卜居
河渚有詩十章志喜邀余同作欣然次韻亦如
先生之數

黃竹先生今夏黃白離商嶽走踉蹌青錢易長苔莓路
畫藁頻移薜荔牆未就丹砂顏屢換欲尋白社願難償
身經開寶流離後那問西川舊草堂

覆巢事過儼他生回首風波噩夢驚碩果兩朝誰鬥健
白頭一意自孤行縱橫鈎黨清流禍峭舊風期月旦評
幾爲借柯憐病鶴羽毛如雪照人明

力圃雖艱勝力耘多時吟嶠望停雲未完婚嫁何多累
投老關河正失群菜把恩羞叨地主薦章名幸脫徵君

故人高義傾頽俗薄俸能爲卜築分

方丈蓬萊事不經收心風物到園亭紅蕖艷後蟬遺蛻
黃菊開時鴈拂翎感遇詩還工屬對垂簾卜屢驗竒零
少微越國真高士移向吳天只一星

松木塲遙路向西人言晝畫似西溪雨中綠樹雞豚柵
霜後黃雲秫秫畦琴筑鏗鏘聲落澗風花高下踏成蹊
憑君指點神先王可待游人爲品題

數折溪橋兩版門也須插槿植籬樊間携翠竹紅藤杖
晴晒牛衣犢鼻禪耕讀新功兒解課漁樵故事客能援
名香老研隨身具目擊誰知道亦存

樂事從來出苦辛錯將勞尾比枯鱗眼空身世殘碁劫

日漏軒牕過隙塵方外衣冠驚俗客夢中墳墓抵歸人
碧幢紅堵村村徧肯咲繁華不稱貧

釣臺何必盡桐江林下人來拜老龐隱几湖山歸四壁
捲簾風雨到西牕花源舊隱今何代白鶴新居即此邦
已約隣翁勤斬竹與排蟹椀打魚樵

一痕龜墨食江郊從此深居遠市朝椰子冠從方士借
筍皮鞵赴老僧招定巢屋角晨依鵲挾彈林端夜逐鴉
馬跡車輪何處覓遁仙名籍在丹霄

槃澗時清且寤歌欠伸光景底消磨年豐米穀登場賤
水濶魚蝦漏網多勿藥肯教眠食減不祥端賴鬼神呵
鷄豚預有登堂約慰我歸來興若何

武林哭萬充宗二首

武功十葉變儒風理學君家創甬東

謂尊甫履安先生

勳爵初

除緣國破饑寒不出勝途窮傳家同異叅三禮

君所著有學禮

質疑絕筆春秋闕兩公

近註春秋惟定哀未就耳

四十九年君勿負蓋

棺餘恨未成翁

忘年交誼許忘形君自殷殷見古情看竹欵門纔一宿

去秋余自黔歸充宗同主一敬之見過一宿而別

篝燈襪被每孤城

充宗下榻海昌每入

城未嘗不快對也

無端泪落期難續

前一日人遠書來有與充宗揮泪而別之語

如

此人亡夢亦驚回首師門誰領袖慈湖風月可憐生

宿黎洲夫子武林寓舍即次先生丙辰九日同

遊舊韵二首

湖山憔悴哭新阡謂萬充宗何意蕭齋榻許連燈火夜長楓

葉雨杖藜秋老菊花天孤踪汗漫三年外萬事荒唐一

笑前話到昆明殘劫罷又緣久別却淒然

徑路先須辨陌阡眼中榛莽正鈎連肯携芸蠹隨書局
任放醯鷄覆甕天出處心情三聘後滄桑人物兩朝前
先生高臥貧何礙流俗知音恐未然

富春道中

烏柏林中霜撒華千樹萬樹圍村家門前紅葉掃還落
白子著枝如白花寒雅成群咳不盡幾處飛出聲啞啞
荒灣敗葦江忽轉鴈陣欲落整復斜青山正缺天一面
澹入無迹雲拖沙十年夢想富春渚拍點圖畫空嗟呀

豈知去家纔百里足所未到如天涯人情貴遠每忽近
往往耳目遺煙霞他年卜居恐未穩此際覓句差堪誇
江山秀絕客懷俗母使擾擾同魚蝦

雨過桐廬

江勢西來灣復灣乍驚風物異鄉關百家小聚還成縣
三面無城却倚山帆影依依楓葉外灘聲汨汨碓牀間
雨簑烟笠嚴陵近慚媿清流照客顏

睦州

過城灘更急直下漚分流樹色銜雙塢山形豁一州
炭烟濃傍塢樵逕細通舟風日晴尤好初冬似晚秋

泊茶園

敬業堂詩集卷四
危樓高百尺水落岸如山村市尚開店檣燈別占灣喜
無塵點髻那用酒熏顏漁笛能相就飄飄壓浪還

淳安謁海忠介祠

桐鄉遺愛在民自不忘公一邑清名著三朝直節同衣
冠瞻古貌俎豆感村翁此日流離意誰憐在野鴻

青溪口號八首

裊裊荷帶風疎疎浪花雨吳客過淳安遙人少鄉語
隔水聞語聲空中應來肖行到響山潭人人發清嘯
溪女不畫眉愛聽畫眉鳥夾岸一聲啼曉山青未了
來舩桅竿高去舩櫓聲好上水厭灘多下水惜灘少
家住溪東西共飲門前水對面不聞聲長灘響十里

長灘在界
口司上

漁家小
女見郎嬌不避日莫並舟歸鷓鴣方晒翅
橋壞竿繫繩水淺牛可跨牛背渡溪人須看綠如畫
屯溪船上客前度去裝茶娶得東村婦經年一到家

威平鎮舊名青溪洞韓蘄王擒方臘處

舊日青溪洞英雄一戰歸江關留故壘草木震餘威路
僻烽烟靜時平盜賊稀悲笳吹薄莫峭壁冷斜暉

入歙州界

青山寒更高白日冬易暮蓬腳影初斜濛濛入烟霧

鮎魚口中流一山俗名小普陀絕頂佛閣頗盡
結攬之勝

神山海外絕經過此地名傳小普陀兩岸樓臺疑蜃氣
中流日月隘鰲波桑田有劫終成幻松頂盤空老作窩
我是游人憐偶到鐘聲回首夕陽多

從屯溪坐竹筏至休寧縣

江路西來盡輕裝稱竹舩人家新屋宇村落好山川沙
壩魚跳岸蘆荒鴈下田怕談兵火事猶記八年前

遊休寧城南落石臺

一片蒼雲護無端隨碧空離竒存石性刻畫憎人功
刻石多
俚鄙語只有朝陽到偏宜曲水通峭寒難久住酒醒忽

西風

過齊雲山麓

亂峰尊白嶽一水接青溪雲自香爐出天盤石磴低勝
游憑指顧倦路失攀躋游子匆匆意征途只向西

晚至漁亭

小步聞名好到來頗覺煩鈴聲驢背米籩戶水窮村旅
食豐年便方言晚市喧黃茅山百折此路指祁門

祁門

二水走江湖下流極瀾翻濫觴不盈尺小縣同發源一
支下錢唐余家東海壘直從朝宗處溯洄到山根西流
入鄱陽鯨口豁然吞飄飄孤帆色帶雨辭烟屯水流自
相背客意難並論五丁誰能駮頑石劃輿坤鏟除恐不
勝徒費斧鑿痕浩浩江湖流一道疾於奔關梁近增稅

亦如石塞津寧觸石磯怒莫逢關吏嗔君看商賈路辛
苦趨祁門

發猴潭出倒湖

石惡狀爭變波喧勢就低小舟輕畏路百折下危溪雪
意雅先覺寒光霧易迷似聞魚米賤已過浙江西

浮梁縣

苦霧吞江去茫茫出遠津長程催短晷白骨散青燐城
小初經亂民愚久疾貧琵琶臨老妓容易嫁商人

景德鎮觀御窰瓷器歌

浮梁縣西開畫棟御廠燒瓷供輦送江天漠漠生黑雲
百竈烟浮日光動初看兩眼炫青紅夜入孤舟夢龍鳳

文成璀璨羽毛活勢健開張牙爪弄畫彩新添寶石砢
異光欲走黃金汞頗聞中使出二年十斛缸成選難中
至尊服御崇節儉珍錯屢却邀方貢即看嗜好非異物
器象雖精本日用同時玉瓚注黃流古玩金魚配清供
君不見宣成嘉萬舊官窠散落民間價自高博古圖成
曾進御猶容欵識倣前朝

登饒州鄱陽樓八韻

東北山根削西南地軸摧豫章帆不斷彭蠡鴈初迴再
見孤城闢翻憐往日災江湖銷戰伐荆棘妬亭臺旅望
天邊豁雄心亂後灰殺霜冬旭暖釀雪曉雲開欲去猶
延竚無聊柰獨來未除豪氣盡飄蕩媿詩才

曉渡鄱陽湖

三更我夢滕王閣東北風高響簷鐸覺來舟子已開蓬
澹月微痕天一角須臾湖面過如飛霜氣撲舩人攬衣
蒼茫烟霧來時路水底紅輪吐半規也知此景殊不惡
失意翻令感牢落少文四壁有江山何苦年年事飄泊
送又微姪自豫章東歸兼示德尹

垂老雙親驗鬢絲薄游仍欠草堂貲關河最左勞人計
猿鶴能寬閉戶期落拓生涯吾自笑滯留情事爾應知
從教物論分優劣點檢初心也旋疑

錢玉友自嶺南來

萬里歸裝一葉身何緣相見即相親世無元九知音少

客到東方自譽頻
南北弟兄愁急雪
關山踪跡悔勞薪
權輿殂落皆天意

羽獵賦萬物權輿於內殂落於外

眼底休輕我輩人

玉友別後寄詩二首次韻奉答

會合洵有緣
此會乃絕竒
數言甫投分
鼓勵兼箝錘
同調世少人
高論宜卑之
平生喜聞過
指摘真吾師
啟我腹笥草
當君囊中錐
刺骨實中病
苦口俄含飴
自笑狂奴狂
况抱癡叔癡

來詩內一首示聲山者故及之

全身受針砭
豈獨論文詞
勉強學新粧
未必盛副筭
沈吟攬古鏡
又恐唾違

時

浪游無近遠
同作風塵面
相顧眼雙青
相期心一片
勿嫌去住乖
各要眠食健
布颿冰雪候
風色五更戰
青燈

豫章城幾夜猶夢見書來感深愛金石矢不變因君激

壯志鍛羽敢辭倦

來書期余同
作都門之行

杜肇余侍郎巡海閩粵故人嚴子愿在其幕中

道出南昌詩以贈別

短裘夜犯章江雪快馬嘶風三十驛梅花催促使臣鞍
楊柳春旂看一色平生未識侍郎面才子翩翩杜陵客
與君昔別年月深約畧歲書更六七余行絕徼偶生還
舌在遙人那堪說半生出處禍亂定萬事蹉跎謀算拙
喜聞田橫出海島旋見盧循免羈紲昔之滄海今桑田
萬戶春耕破甌脫如君此去真壯遊幕府從容借籌畫
乾坤昇平我何樂差勝危彊事行役敝廬家世東海濱

禁網佃漁寬水國遲爾同歸作飽餐巨魚雪點吳鹽白

時初開
海禁

喜陳允文自故鄉至

十日春風釋硯冰客邊詩句擬催徵愛題僧舍紗籠壁
恨事江城雪打燈壓擔書兼行李重飄蓬感為故人增
西山晴色差堪望高閣何因載酒登

題聲山姪仗劍擁書圖

君不聞王喬厭世方盛年飄飄笙鶴緱山巔神仙尚須
致身蚤何況富貴如流泉爾生負竒學書劍三十頭顱
行可見毛錐秃穎刀善藏母乃多才累窮賤竭來汗漫
事遠游劍首一映徧九州下澤車中羞識面跼蹐豈必

皆封侯歸來勸游凡幾日好酒好書兼好色明朝一笑
又出門惘惘都非可憐別時清氣壯驕不得依舊收身
弄文墨有田不耕男已長無米能炊婦非拙何緣此日
遂支扉難免他年聊捉鼻柳條風軟記騎馬木榻香清
夢調瑟余亦東西南北人圖中光景增太息

元宵前一夕家觀察伯署齋小集次允文原韵

以下
甲子

又作春燈宴他鄉共此筵盤分柑味美時有以四會
柑相餉者月

傍燭花妍故態逢人發新愁被酒捐南州有懸榻我醉
且同眠

與劉北海君與令季太史俱先大
父門下士故篇中及之

我降庚寅月建午襁褓含飴及見祖升沈未定矩矱移
荏冉今年三十五客塵南北浪奔走家學淵源迷步武
先子音容漸蕪茫典型何處追王父小時猶記竊餘論
文集諸劉指堪數翰林風度杳莫即伯仲聲華憶明府
布帆夜下十八灘幾日春風到南浦頗聞人頌神明宰
章貢循聲比卓魯劉時宰頓縣一城烟樹起樓臺千里關河
靜鞞鼓官閒往往飛鳧出緱嶺軒軒見霞舉此時我作
豫章遊却恠知名緣獨沮即論世講屬前輩小子投謁
固其所懷中一刺署姓名雙屐逡巡阻春雨先生忘年
復忘分先枉高軒訪羈旅下車相揖亦有人此事今亡
乃聞古修名不立行可媿半臂重交義奚取謂余當有

祖父風不料頭顱尚如許長身三世求形似母乃遠戚
嗟仰俯入門一笑想欲狂注目含情兩無語

章江舟次送李斯年赴湖南幕府二首

同學紛紛起布衣文章聲價剩珠璣怪來五十高常侍
猶自隨人側翅飛

瀟湘歸櫂我匆匆重到如君又不同若對亂前談亂後
不知誰識李元忠

楚黃陶忠毅公以世胄協守寧前衛癸未城陷
公殉節焉事具合肥宗伯行略其冢子上辛出
公畫像索題用舊韵

已陷金城破玉門瓜沙河渭總啼痕捐軀幾輩曾當局

抵掌何人不太言
五代鐵鎗傳畫像
百年江月酌清尊
李家降表尋常事
話到書生惱夢魂

黃泥山村看桃同錢道耕倪上韓家兄子敬南
城友日姪聲山

春洲雲煖烟濛濛
天勢四垂濃靄中
一望千檣萬檣外
綠楊芳草交青葱
沿洄曲岸行數里
小艇閣沙水忽窮
捨舟聯袂赴村落
勝境引入桃花叢
迷離景光耀平野
爛熳高燄燒晴空
禳華似慳微雨著
繁蕊欲折朝陽烘
居民補網好圖畫
屋茅籬竹家家同
沙灣汀溼限南北
徑路曲折迷西東
老人衣冠稱古貌
往往負戴隨兒童
隔花姹姪自呼伴
笑語已斷迎迴風
牛羊未歸隘巷靜

雞犬亂走柴門通武陵光景在人世但患放棹無漁翁
兩頭絃管百壺酒醉夢一醒風塵胸江村草堂我亦有
頗笑此景他鄉逢韶華經眼况偶到有意留戀終匆匆
章江夕陽催晚渡水面回看紅雲紅

新柳詞和允文二首

輕烟和雨着梢頭萬縷千條作態柔落得游人春興懶
遠遮鄉路近遮樓

桃花輕浪過花朝溪女提魚渡板橋一種紅腮多貫柳
阿誰先挽最長條

次韵酬別聲山姪

讀書恨不搜大酉結客每慚稱小友命窮共落磨蝎宮

木偶尋常嘲土偶身輕劬翼尚江湖力困常鱗等淵藪
蚤知去住兩牢落曷不杜門乃奔走章江二月春風顛
橫管孤吹折楊柳愁來襖被思決去貧戀家居恐難久
青燈聽雨且鳴雞白眼看雲又蒼狗醉眠夜夜長加股
欲出朝朝還被肘行裝偶到急雪前歸棹纔移禁烟後
有生光景爾許過懷抱逢人詎堪剖酒尊一澆壘塊空
如剖魚鱉去乙丑山妻不須視儀舌俗子合訝哆衍口
予今高堂况白髮好去稱觴酌大斗天倫樂事古所難
鬱鬱猶能居此否

疊前韵訓別友日兄

弟生庚寅兄乙酉五歲肩隨稱棣友兒時嬉戲失同群

稍長衣冠就參偶雞豚近局接南北烟火深村望林藪
余游故知生理拙君亦何爲轉蓬走夜雨燈挑江上花
春風夢繞門前柳男兒有懷莽未遂僕拍半生時已久
未能扣角事騎牛抑且埋名作屠狗不爾合甘原憲分
鶉結從渠見襟肘誰令志氣自摧頽漫著征衣隨短後
君平季主世少人眼底升沈向誰剖頭盤叫噪抒狂憤
笑聽更籌移子丑忽然顧影還自憐氣塞神傷箝在口
豈應美好長貧賤定有光芒射牛斗勸君自信當益堅
適野不須謀可否

三疊前韵留別恭庵兄

黃雞白日移卯酉失學無端負師友名微自甘時所棄

命隻敢嗟吾不偶

出李廣傳注

惟兄諒我謂我真野鳥心終

戀郊藪君家如圃大可憶
瓠石開池煩下走
竭來搔首動鄉思想像
春天好花柳阿翁官高
諸子秀世業平泉必長
久余也先疇漸拋棄
熊虎何當子命狗從教
久瘦帶寬圍遑問長貧
衣露肘低顏分出古人
下尚冀鞭羊視其後愛
君玉樹臨風前老蚌明
珠一雙剖杜陵兩男
養無益少長何堪集
癸丑八百桑株十具牛
經營無物貽黃口願君
綵衣侍歸駕莫謾折腰
為五斗某丘某水記釣
遊許我題詩草堂否

四疊前韵訓別允文

與君訂交從已酉鄉社無多推益友
文瀾一篇論警策

詩格千言誇對偶白眉三馬人所畏

北史馬子廉兄弟三人皆能文時有

三馬皆白眉之譽

昆友聯翩出才藪余時懷槩初出遊未免籍

湜汗且走蘭茗翡翠爭秀句何異飄風嫋垂柳登塲鹵

莽拙用長堅壁逡巡困持久契舟已往莫求劔畫虎雖

成終類狗君今落筆更老成斂手薑芽看蓮肘但思上

第謝眼前肯顧虛名計身後精金百鍊行自惜璞玉一

圭猶待剖丁年行笈記癸辛甲族科名豔丁丑

謂允文從祖素

菴相國未能飽飯便汝腹也學饑驅餬我口客中告別別

倍難濁酒直須傾一斗暫留幾日辦歸裝長說倦遊今

果否

同聲山姪過羅飯牛禮洲草堂別後賦寄用昌

黎寄盧全韵

先生老向塵埃裏有志竟成高蹈矣衣冠已與世人同

猶自芒鞋高屐齒竹溪

羅舊居地名

茶園寬十畝春雨分膏

給妻子清風七梳生冠石

寧都冠石茶出飯牛手製者品在顧渚上絕跡杜

門凡二紀買山定有賣山人窮乃辭鄉奚足恥舊莊唱

和傳裴迪亂國流離傷董祀巢由逃世事果難身未出

山名滿耳一聲長嘯落天半散作雲烟隨處士都無猿

鶴愧林巒絕少鷄豚餽鄰里獨携筆墨與人際堅臥有

時呼不起南州懸榻尋常下小技似可供驅使彼皆金

夫勢力求未許感恩况知己豈惟落筆不輕易立品潔

身從此始淨明菴主石田翁前輩風期看未已半生衣

食天故吝稍稍芻薪給驟駢硯田一片歲有秋食力聊
用代耘耔先生猶云吾負疚嬾惰無端釋良耜故人往
赴河陽幕本不希心榮膺仕先生療貧策又竒獨往孤
行竟誰恃禮洲草堂地清絕見說賃春連圯址易堂人
物近無多把臂此來君準擬萍踪怪底成相左雨雪殘
冬悵無似朝朝江口望歸帆百日奚童鬻生趾春深沙
渚停烟榜有客忽傳君至止廿年馳想結深企欲致高
人我何以急呼阿咸山聲徑造門渴馬奔泉勢難俟先生
應門無五尺反鎖柴荆入村市歸來蕭寺忽相逢一臂
初交乃狂喜招呼雙屐過江閣草草杯盤有真理乞君
畫稿幸不辭謂我頗可尋涯涘斯人不因筆墨重獨行

自足傳野史即從畫品論高下清矯寧讓營丘李我詩
不工何足酬別後空慚寄雙鯉

芙蓉庵水亭

徑轉春陰午未移小亭如蓋俯漣漪柳邊風到鱗鱗活
鏡裏欄開面面宜欲去興狂呼酒伴重來緣淺看花時
此間著我真塵俗何用多留疥壁詩

清明風雨舟發南昌允文聲山追送於江干更
以數言留別

竹鷄啼苦催清明滕王閣前春水生西山高入雲霧裏
雨勢下壓洪州城桃花杏花半狼籍岸柳自拂孤舟輕
連朝有約同買棹二子未果余徑行雲山欣欣赴歸路

烟樹漠漠愁離程
布帆風急不肯住
到家正及聽新鶯

康郎山功臣廟十四韻

疇昔驅除會英雄
想像間驛移青雀
舫酒灑白茅灣
鷹隼搏空擊鯨鯢
授首還波濤經虎
尾矢石避龍顏一
戰西南定群公策
力闢死方開國運
生不點朝班紀信
無遺恨曹成本世
官顯榮褒後裔茅
土愴重頒奕葉將
軍樹廟前古槐相傳明太祖破偽漢時封為將軍中流砥柱山
炎風焚鐵券石馬
嚼金環黃屋今無
跡朱旗閃尚殷太
平何事業要害此
江關廟貌瞻嚴肅
時情易險艱興亡
他日事清泪獨

潺潺

餘干道中

新烟幾點散晴霞
遠岸殘桃晒網家
莎草一汀長帶鷺
湖田二月已鳴蛙
葱葱曉日銜山秀
裊裊春風赴柳斜
自咲薄遊緣底事
漲痕空記去年沙

昌江竹枝詞八首

浮梁縣西山漸平
浮梁縣東水更清
濛濛天氣長如雨
臥聽前灣水碓聲

甗石硨硨轉轆轤
舂砂淘袖有精粗
年來御殿添窑戶
不種山田另起租

椶櫚葉瘦芭蕉肥
菜花半開桃李稀
背山園圃蜜蜂出
近水人家燕子飛

穀雨前頭茶事新
提筐少女摘來勻
長成嫁作隣家婦

敬業堂詩集卷四
三
勝似風波盪槩人

船頭船尾不多高
盡日爭先走怒濤
博得夜來春睡熟
一篷烟雨半枝篙

小兒灘頭水沒磯
幾點雨著行人衣
草煙迎岸翠撲撲
牧笛未歸鵝鴨歸

一繩飛界兩山頭
積石排樁抵截流
驚起野鷗鷓箇
五更風浪網初收

村殺山家唱四時
本鄉歌好少人知
愛他曲水如巴字
別與新詞譜竹枝

齊雲山六絕句

仄徑丹梯萬仞懸
石楠擁蓋不知年
不因鐵笛吹山裂

那得游人到洞天

右天門

雨織龍梭香作涎四時不斷吐飛泉藕絲簾子玲瓏影

捲起晴雲別有天

右水簾洞

兩峰御象對崢嶸鐘鼓聲中玉座清夜夜河魁瞻北關

羽衣天半坐吹笙

右真武殿

禹鼎神姦散九州誰教一柱峙丹丘白雲已鎖塵寰斷

還有香烟在上頭

右香爐峰

急歸悔不上匡廬辜負峰南大小孤恠事此來仍滿願

已看五老又三姑

右五老三姑峰

輕身直上挾天風雨外天都望或封安得近南長見日

與排三十六芙蓉

右紫霄崖

武林寓樓與德尹夜話

迎面蛛絲落幾番每從遠信報平安各驚顏狀他鄉換
一落江湖戢影難犵鳥蠻花天萬里朔雲邊雪路千盤
六年踪跡連牀話大似羗村夢夜闌

立夏前三日集汪寓昭願學堂兼留別姚天寰
顧九恒沈昭嗣陳廣陵章豈績馮文子嚴定隅
及家德尹時余將入燕二首

一櫂江城又隔年春雲春樹記尊前故鄉樂事留高會
獨客關心奈別筵興罷艷歌重按拍酒闌孤月正當天
年來事事輸人後齒序慚居六子先
同會十人余齒在第四
綠酒紅燈促坐深無多同調况知音琢磨頗望成全璧

激烈何須到碎琴起舞自憐中夜影急觴難緩此時心
軟塵十丈騎驢去怕被人傳倚樹吟

出莊
子注

西水讌集留別姚夢虹宋受谷張王士張介山
邵翼雲金子由吳震一卓次厚九如

南路風濤北路塵歸艤纔泊復征輪三秋斷梗如遊跡
一座清風抵故人壁壘降旗文戰罷乾坤攬轡客懷新
天涯珍重臨岐意只有貧交不諱貧

敬業堂詩集卷四

此處為書中正文，因紙質嚴重損壞，文字極其模糊，難以辨認。可見文字呈縱向排列，佔據了頁面大部分空間。

敬業堂詩集卷五

海寧 查慎行 悔餘

踰淮集

起甲子四月盡一年

甲子夏遊學京師始渡淮而北客有賦涉淮以壯
余行色者敬謝之曰君不聞橘踰淮且化爲枳乎
余方虞余之失其橘性而與枳爲類也

歸自江右隨有燕山之行示別家人

南北勞勞但可唾流光瞥過少年時祇緣累世留門戶
那得此生無別離斗酒且禁連夕醉長箋難和送春詞
勿論向後愁深淺已覺燈前鬢有絲

錫山舟次遇外舅陸射山先生自淮南歸

落帆當淑浦曲岸轉拏音已感骨肉語兼傷去住心斷
雲晴出岫老鶴暮歸林莫作俱飄泊翁今白髮深

過二瞻兄維揚寓齋兄有贈行詩次韻酬別

征衫初換且停橈一日江程兩信潮欲去郵亭塵滾滾
乍來岐路馬蕭蕭詩文價定人爭購書畫舩輕客待邀
劈紙風流看好在綠楊回首記紅橋

雨發宿遷

苦被林鳩喚雨多北風獵獵渡黃河不辭滑路衝泥去
且免驚沙刮面過一騎鮒魚仍入貢十年瓠子尚聞歌
饑荒接壤人方說愁見城南豕涉波

郟城道中

蹇驢三四驛平野入飛沙白日孤城閉清沂一道斜井
疆郊子國風物魯人家漸與淮南異村村枳棘花

沂州送錢玉友往新城

又作殊方別春衫客泪收但須眠食健莫話短長愁鄉
夢經蠶月人情望麥秋黃雲天四合何處辨青州

伴城旅店次徐子大壁間韻

淺草平陂極望通客程漸入亂山中坐消髀肉全無爲
貧檢詩囊幸未空沙磧涼生蕎麥雨茅檐香過棗花風
却愁長日行難到又指斜陽一抹紅

齊河

關城餘霸氣雞犬入齊風山豁平沙外天低小縣東魚

鹽知俗古豚酒祝年豐別有雄繁意休誇管晏功

晚抵晏城次壁間韻

目力窮邊酒旆生
孰梅天愛偶然晴
高樓吹角風無賴
壞壁留詩客有情
紅日忽沈烟起處
白楊長遞雨來聲
萬山回首如屏障
一片平蕪接晏城

渡蘆溝橋

草草漁梁枕水邊
石湖詩裏想當年
誰教甃石通南北

鐵軸銀蹄一例穿

金史章宗明昌元年始建蘆溝石橋

京師中元詞二首

萬柄紅燈裹綠紗
亭亭輕蓋受風斜
滿城荷葉高錢價
不數中原洗手花

銅盤小拍坐張燈
手拍城東滿月升
從此夜遊涼似水
漸無人賣擔頭冰

憫農詩和朱恒齋比部

豳風本王業稼穡知艱難
立政務明農化理自古然
我從田間來疾苦粗能言
請陳東南事約略得其端
初冬下菽麥深溝及春前
根株載培護益使土力堅
麥黃未及秋晚蠶又催眠
祈晴三四月雨水翻連綿
針水分稻秧襪襖行耨
田時方仰膏雨杲杲恒
當天炎威一熏灼泥淖
同熬煎委身沸湯中辛
苦少所便好風槐柳下
欲往不暫閒老穉亦靡寧
桔槔遠吸川或防霧損花
又恐蟲傷根半年壟畝畔
力竭心亦殫如此冀西成
食報理

或存但令畝一鍾歲事幸告竣私租入富室公稅輸縣
官所餘尚無幾未足償勤拳况逢水旱加徃徃多顛連
逝亡等無地芻牧肯見憐高位有仁人垂聽宜惻焉所
以古大臣農事恒惓惓流移進圖繪咨傲陳風愆有時
亟施賑詔旨輒擅專有時撫瘡痍逋賦請悉蠲不上封
禪書不獻羽獵篇乾坤生生機君相搯微權一念苟憫
卹惠風自遐宣矧今天子聖綏邦必豐年

將有西山之遊次謝方山員外見貽原韻

勞生莽莽咲鹿機又向燕臺換袂衣出郭人如秋澹蕩
入山天愛雨霏微閒拖竹杖尋詩瘦賤買村醪覓伴稀
羸得謝家新句好澹忘隨處領清暉

松林寺

含烟含露一梢梢
花果禪扉鎖合牢
野鳥不知園有禁
隔墻啣出紫蒲桃

晚抵退谷與大司空朱右君先生露坐啜泉

晚色秋光帶遠垆
眼明初喜見涼螢
泱流噴石渾疑雨
老樹交陰合有亭
照影豈能忘盥漱
出山誰復辨清泠
閒僧尚記曾來客
一縷茶烟話酒醒

公不到西山二十八年矣老僧猶能

說舊遊時事

宿隆教寺僧房

最愛堦墀細雨中
瓦盆高下列芳叢
白花紅子皆秋意
斟酌西窗一夜風

從水盡頭步上五花寺閣

數折溪橋接水源，亂鴉高樹又村前。
路危礧阻千重石，山偏窗開一面天。
佛界偶來宜白晝，帝城難辨是蒼烟。
留詩莫作匆匆去，勝境吾將借榻眠。

臥佛寺

古寺無僧佛倚牆，臥聽蝙蝠掠空廊。
晚來光景尤蕭瑟，葉葉西風戰白楊。

金章宗手植松在壽安山西嶺上

壽安山頭一老松，從下仰視青童童。
羽衣仙人擁蓋立，柄短却作偃僂容。
我思躡屩苦無伴，范老性華興到許。
我從婆娑初自枝，亞入中乃可置一畝宮。
四傍四枝分

四面側理橫出交蓬鬆東西南北不相顧意到各自成
虬龍中間大枝裘挈領高勢一攬收羣雄其旁峭壁截
牙角直下千尺方藏鋒蒼髯翠尾掉空際蜿蜒飲澗天
投虹千山萬山似搖動鱗甲未斂雲濛濛須臾夕陽轉
西麓脇下叟叟生微風一聲老鶴忽飛出竽籟散入隣
菴鐘老僧拍似時代古手植傳自金章宗是時朔南罷
兵革貢使一一舟車通明昌泰和號極治擊球詐馬習
俗同近郊亭館恣遊宴逐獸不入深榛叢遺山野史有
深意國亡事去忍更攻孤臣飲泣記舊恨肯畏後世譏
不公洗粧樓空春月白射柳圍廢秋花紅一朝故物獨
留此鬱鬱幸自蟠蒼穹爾來四百四十載坐閱桑海如

飄蓬輪囷差堪伍社櫟瀟灑猶足驕秦封君不見報國
門前數株樹托根悔落塵埃中

碧雲寺後一山皆內監葬域中有豐碑二統刻
魏忠賢里居官爵甚詳守僧云忠賢自爲生壙
本朝初年忠賢名下葬其衣冠於此恨無有力
者培其石也

碧雲臺殿倚雲端香火幡幢屬內官一代賢奸青史定
兩朝黨籍白碑殘松杉暮雨鴉音革羊馬秋風石骨寒
却咲山靈無藉在猶容厠鬼瘞衣冠

冒雨至香山晚宿來青軒

曲磴初從鳥道攀短墻東面抱灣環九重城闕微茫外

一氣風雲吐納間
暝色浮鐘來別寺
秋聲分雨過前山
紅塵那許高千尺
任放層軒擁翠鬟

同吳六皆陳叔毅湯西厓宿摩訶菴

禪榻吹燈睡不成
棲烏枝上已三更
紙窗一面朦朧月
只道秋聲是雨聲

白鸚鵡次魏環極先生原韻

古有雕籠戒今看
負質竒縞衣窗外
月白雪隴頭枝太
潔從人忌能言被
俗疑商山留羽翼
皓首托風期

原詩有秋

陰高漠漠是爾入林期之句蓋公歸志已決矣

重陽前六日同翁元音彭椒崑錢玉友朱遠度
吳六皆陳允大叔毅沈客子湯西崖談未菴家

荊州聲山小集分韻

青袍紅燭影相銜
劈紙心情故不凡
柿葉庭空聞朔雁
蘆花水淺夢南帆
探驪有客曾驚座
歸燕無詩亦畏讒
開口勿輕談世事
尊前除飲便須緘

過顧培園編修新寓

不遣輕塵點鬢華
斯人直比玉無瑕
蜘蛛屋角垂垂露
蟋蟀堦除艷艷花
半枕茶烟清畫閣
一窗香篆煖文紗
從今唱和貪多暇
底用題詩苦憶家

九日讌朱大司空花莊次韻

漠漠秋蕪一望開
驚心節物帝城隈
閒招南國騎驢客
來上西風戲馬臺
人與黃花同白社
鳥隨紅葉下蒼苔

六年此度天南北

巳未在荊州與申在銅仁辛酉在惆
貴陽壬戌在蕪湖癸亥在西湖

帳名園又舉杯

送六皆歸杭並寄章豈績馮文子嚴定隅二首

風急馳鳴沙外村轉蓬何意復歸根多時白髮思遊子
依舊青衫出國門光範三書原失策涓城一曲最銷魂
買田只合山莊住珍重天涯贈別言

黃葉黃花媚晚晴酒旗茅店一程程稍嫌壓髮邊沙重
不礙衝寒布被輕夢短賸留他夜話計偕稀上故人名
得歸我亦抽鞭去忍向桑乾聽雁聲

嚴矐菴侍御招同惠研溪吳天章王咸中王孟
穀朱西峻喬無功陳叔毅湯西崖小集即席分

賦

相逢塵埃中交臂面不熟雅人著懷抱有如瞳在目侍
御鄉國賢未見意久屬司閹戒勿拒徑造少躑躅一月
三過從看到秋殘菊長安多讌會熟客後先續長揖容
吾曹情深感君獨紅豆致蕭淡河東才屈曲石陽光走
珠漢陽璞藏玉髯陳好儀表夫喬絕谿谷小朱及瘦湯
秀發秋眉綠廁我數子間傭保坐擊筑淋漓取盡興豪
爽一破俗逃觴或竟去下榻或信宿戲具雜博籥古音
披簡牘狂言醒不禁好句互傳讀坐令布衣交放誕惟
所欲甘從平原遊不學步兵哭吾生莽無涯疲甕信兩
足玉川洛城居并少數間屋未能逃空虛時復累口腹

所嗟才地劣徑路故窄起諸君湖海士相輾適如輻倘
不鄙迂疎前期幸交勗

與研谿別後疊前韻寄之

我從湯子交耳君名已熟初來長安城欲見塵眯目名

園一杯酒邂逅情未屬

余識研溪於趙
恒夫農部席上

別時蓮蓋紅懷

刺久躑躅忽忽秋向老花期過黃菊晚赴嚴公招名流

趾相續森然授几席後至惟爾獨衆中造膝談稍稍致

欵曲湯言不我欺伊人果如玉似從坡陁遊迤邐入崖

谷松篁幽徑轉照我鬚髮綠石澗斂雲霞泉清作琴筑

對之浮氣盡亟取藥吾俗曲尺移木床醉留同一宿男

兒屬有才未了三千牘買田歸可種買書行可讀委身

倦仰中初念固不欲况當搖落候有痛忍輕哭涼燈一
穗花夜半開未足浙瀝風洒窗淋浪雨鳴屋明朝門外
路泥淖驢沒腹連鞍共君出寸步苦局趄紛紛疾走兒
馬騁車脫輻即此慎所之久要互相勗

汪東川宮贊屬題秋林讀書圖時汪給假將歸
似曾依樣買林臯只愛攤書不蓋茅榦老從添鴉點葉
影疎初見鵲成巢好風開卷聲相遞古墨分香手借抄
怪得先生官况懶畫中光景十年拋

送大司寇魏環極先生予告還蔚州二首

曳履星辰二十年尚書襍被故蕭然勇能自斷天難奪
清畏人知世已傳白社竟成娛老地黃金不貯買山錢

閒雲一片秋寥廓何限風光倚杖前

嶽嶽寒松表

御書

寒松堂公臨行時御書賜額也

新堂歸到好懸

車身名似此真無媿進退何人綽有餘報國文章傳後

起

謂無偽中翰

立朝風骨想當初不因祖帳東門道太息方

煩比二疏

送陸蓬叟之井陘

不道西遊爾許難
万峰高下渡桑乾
亂鴉雪緊荒程暮
叢雁天低斷角寒
燕市莫尋當日伴
并州且作故鄉看
到時尺素煩馳寄
及與梅花報歲闌

叔毅見示初度述懷詩有感而作

與君世好幼同里
其室則邇其人遐
年踰三十未識面

各被衣食驅天涯
余顏顛頽變黑瘦
攬鏡未免頻咨嗟
子髯毳毳長一尺
瀟洒亦復沾塵沙
燕山此來忽交臂
相視莫逆心靡他
衝風冒雨屢相遇
朗吟狂咲聲謹謹
行時肩從坐齒序
愛比兄弟豈有加
一朝顧我歛不樂
刺眼怕看重陽花
叔毅生辰在九月九日
新詩一篇把似我音調
慘裂如秋笳對之思苦難
卒讀冰雪入口冷戰牙
看君炯炯具至性
母喪未闋衣仍麻
泪痕徃徃在枕席
臯魚岐路憐京華
憶余浪跡走絕徼
未夏四月初辭家
先君下世纔一載
面目赧汗逢人遮
平生粗知奉禮教
豈敢自外傷芸瓜
至今肝腸抱至痛
視息母乃同脉
緞歸田但祈免溝壑
此願易給原非奢
天於我輩胡獨忍
故令

具體蒙疵瑕子今襟期頗澹漠西溪片瓦已可賒塵埃
洞瀕一回首便欲策蹇乘柴車幾時真約結隣去對門
老樹枝槎枒

研溪索題紅豆齋詩冊二首

東田西澗勢相參此本如今恰有三一點丹砂非俗物

居然鼎足占江南吳中紅豆三本一在拂水山莊一在
王奉嘗東田一在青溪堂即研溪近

居也

薄遊久欠買山資齋笏初安負一枝但使主人長閉戶

樹名何取號相思

題惠研谿崢嶸集次汪蛟門原韻二首

不成吟上紫薇亭翡翠琉璃并作屏一事比渠差較勝

自編佳句付樵青

紕繆論才本不多詩家勁敵許誰過不須綽板尊前度
搖膝聽君喚奈何

硯齋吟吻暖生春推爾堯峰步後塵賴是老元偷格律

知音此外斷無人

每被老元偷格律樂天語也
蛟門舉似研谿故借作轉語

燕臺雜興次學正劉雨峯原韻十首

九關王氣鬱千秋如此風光蕩客愁東路雲垂遼海澗
北條山勒太行收天蟠宮闕瞻螭尾地擁塵沙散馬頭
老柳不禁吹笛意夕陽疎影傷高樓

千古荆丹事最奇誰教秦騎竟橫馳漁陽鼓動天方醉
督亢圖窮悔已遲他日酒徒猶擊筑向來博道抵爭碁

無聊尚有酣歌會不似東方但苦饑

北史流傳樂未央上都幾處闢球場
幕南地空聞傳箭花外樓高見洗粧
紫色蛙聲雄八族烏衣馬糞笑諸王
分明裂帛湖邊月及照三朝舉國狂

十三陵古隔巖關往事低摧父老顏
黃鳥哀歌經國恤紅巾新籍點朝班
金戈運啟驅除會玉匣書留想像間
斫却冬青人盡識稜恩羊虎尚斑斑

直放江湖日夜東異時黨論比狂風
清流禍起名賢盡甘露謀疎國運終
一紙興亡看覆鹿千年灰劫付冥鴻
時平翻幸吾生晚不見郊原戰血紅

班馬文從一代編世家人物數華顛
藏書已獻言何諱

焚藁無期客問年莫道汗青從蠹蝕好憑頭白寫蠶眠
諸公衮袞皆才彥珍重須教信史傳

帳殿崔嵬令闐寥凱歌連歲奏鈺鏡雲深雁路朝盤馬
雪點狐裘夜射雕都護玉門關不設將軍銅柱界重標
職方別載魚龍國咲拍烽烟薄海銷

恩波一夕滿江湖下詔蠲租例久無忽見黥黎成感涕
始知草野愛微軀龍舩旗鼓三江戍馬輦雲霞五岳圖
盡道登封儀注古秦松容易比貞符

朱門祭戟列東華金谷筵開辦咄嗟雪甕分漿啜滑拙
霜刀剪韭妬萌芽歌喉欲斷從絃續舞袖能長聽客誇
羸得狂生無藉在欲捻書籍問東家

百分一棹過觥船何限關河載酒前投筆生涯經絕域
定巢歸計失驚絃縱橫野馬群飛路跋扈風箏一綫天
曾是征南舊賓客摩挲掌髀肉也潸然

冬日張園雅集同姜西溟彭椒喆顧九恒惠研
谿錢玉友魏禹平蔣聿修王孟穀張漢瞻汪寓
昭陳叔毅湯西厓馮文子談震方家荊州聲山

限韵

丈夫置身非廟廊便合食力勤耕桑誰教鹵莽走京洛
去住兩策無一長天公似憐太坎壈一事獨許平生償
招呼朋好作痛飲逸足快脫籠頭韁城南小莊如畫裏
樹頭一扇風旗張忽從空曠入叢薄積雪寒峭屏山傍

籬根涸池受落葉窗面破紙穿斜陽圍爐坐密氣漸煖
稍覺冬律回春光大梓蒸菜芣薑辣滿甕印酒開泥香
蒲萄已充筵上果但見枯蔓牽隣牆初拈險韻鬥傑句
旋徵雅令搜枯腸須臾耳熱更豪劇角逐兩兩爭低昂
傷人却問何所樂我亦自咲狂夫狂三年隻身走万里
絲路裊裊衝蠻鄉豈無釣藤蠻中酒名拚獨酌意緒冷淡難
禁當翻身勇決作歸計又被饑餓驅遊裝別人騎馬我
徒步鍛羽無分追高翔行藏眼底但如許有意排遣終
悲涼風流見賞古不乏跌蕩慎勿矜辭章明朝定傳好
事口拍點此地成驩場安知酒徒殢放意不欲與世衡
鋒鏑城頭鴉啼客盡散獨立四顧神蒼茫

與張漢瞻次侯大年韻

竹垞今名家從君賞文格每逢最佳處輒爲浮大白
抱萬卷書羞隨五侯客養親冀一第歲月去已積變體
爲時文頻遭按劔斥皇天老眼暗才地每相厄何妨掃
蛾眉稍稍傳粉澤肯違靜者性彼好此不易

送少詹王阮亭先生祭告南海

祝融南都水環滙赤龍渴飲九州外扶桑日枝万丈高
吞吐晨昏變明晦颶風磨旋鬣帆片蜚雨珠沈蛟室珠
幻呈綵縷現蜃樓淡入蒼烟失鰲背不知靈封畫何境
禹鼎無從辨疆界元和一老去作碑廟貌千秋遂稱最
茫茫元氣收不盡好手何人復堪代康熙甲子 帝東

巡特遣輅車告時邁瑯邪先生叩命往嶺嶠星明指華
蓋祠官奉幣紛趨蹌天使陳辭虔跪拜靈旗肅肅雲蓬
蓬一氣流通百神萃向風海鳥聽鐘鼓有眼蠻人識冠
帶時清邊徼無烽燧道遠詞臣多紀載公之文章在館
閣每借名區發雄槩曩時蜀道今海邦盡泐光芒天不
愛後先人物諒無幾才地彼此恒相待所傷或從遷謫
到終恐才鋒束機械如公擁傳真壯遊直放胸期寫豪
快豈徒榮遇際曠典已見風流壓前輩佛桑花發啼鈎
輶幾日歸航下瀧瀨還朝快示紀行篇浩浩洪波納千
派旁人若問陸賈裴徑尺珊瑚手親碎

題田綸霞少叅山薑詩後

得從京國數追隨
真愛山薑一卷詩
佳處不嫌千遍讀
識君翻恨十年遲
古人可作心相許
同調無多論稍卑
便欲借抄煩乞予
手彈紅燭寫烏絲

小除夜椒崑招同沈韓錫陳叔毅談未菴家聲

山集王巖士樞部齋限韻

蠟燈垂燼夜厭厭
寒薄重裘雪滿簾
得路才華同輩少
椒崑刻管畏人心跡擇交嚴
座中放論歸長悔
醉裏題詩醒自嫌
等是關山牢落意
年年馬齒路傍添

次椒崑寒夜書感見示原韻

多生積習未全除
烏有何勞問子虛
四壁燈明孤影外
一宮霜偏二毛初
也知作客年年慣
若論謀身種種疎

比似無家還較勝叩門連夜得兒書

除夕飲許時菴先生寓齋二首

南衝烟瘴北風沙每到殘宵輒憶家
土鏗光陰飛石火瓦盆消息候梅花
百觚濁酒澆愁緩一杵疎鐘警夢賒
草草行藏十年事寒鐙影裏又京華

小閣圍爐薄雪侵坐移宮漏夜方深
最憐入座聞吳語轉遣思鄉動越吟
射虎殘年留想像亡羊岐路判升沈
對床未易論前事倚賴鳴雞激壯心

敬業堂詩集卷五

敬業堂詩集卷六

海寧 查慎行 悔餘

假館集上

起乙丑正月盡一年

甲子秋闈被放將出都適黔撫楊公內擢少司馬
相留邸舍丙寅冬公以養親告歸臨別檢點詩笈
得若干首蓋從公唱者無過數篇餘皆應詔雜作
分上下兩卷

乙丑元日立春

忽於此地逢元旦况復斯晨屬早春萬里關河雙眼雪
半年衣袖六街塵閉門客少詩初就老硯冰堅墨未勻
擬遣家僮擇歸日曆頭愁換一行新

人日和朱大司空作

纔到春晴馬意驕
金溝流水玉河橋
東風吹綠鱗鱗活
倒捲餘寒上柳條

錢幼鯤將遊江右以詩留別和送一首

西江吾舊到爲爾
唱驪駒山縣稀逢驛
風帆健過湖別離
無善狀貧賤有長途
草色春衫外飄零奈酒徒

鳳城新年詞八首

萬歲山前百戲陳
內城排日作新春
金錢多少纏頭費
半出朝元會裏人

綺羅珠翠極鮮新
襦袴誰憐雪裏貧
一樣昇平好時節
兩宮春帖進詞臣

杏黃韁配紫貂鞍 天子親祠祈穀壇前隊不教傳警

蹕萬人齊傍馬頭看

纔了歌場便賣燈三條五劇一層層東華舊市名空在

靈祐宮前另結棚

雀翎風細遞傳呼三日 君恩有賜酺飛放泊前騎馬

入文官班次執金吾

巧裁幡勝試新羅畫綵描金作鬧蛾從此剪刀閒一月

閨中針線歲前多

添得樓中幾日忙簇新裙帕紫姑裝一年休咎憑伊卜

拍手齊歌馬糞鄉

繭紙輕敲作鼓聲啣環絡索鐵錚錚踏歌連臂同兒戲

何限年光付送迎

花朝前四日朱大司空招遊南莊同田荆巖編

修作

馬首年光柳色新
郊原一榼去尋春
題詩我是重來客
稱意花如舊識人
青嶂捲簾晴帶雪
好風擡袖座除塵
公如早爲蒼生出
絲竹陪遊得幾巡

石陽山莊爲王咸中賦即送其南歸

十載才名滿帝都
明朝襍被竟歸吳
重穿曲逕尋蒼陽
獨上高樓望太湖
放艇有人春載酒
打門無吏夜催租
眼前此境殊難得
或恐桃源但畫圖

疊舊韻送研谿南歸三首

軟塵堆裏出都亭却指家山入畫屏
笑到清明沙路盡一鞭淮岸柳條青

陌上重聽緩緩歌家如傳舍偶經過
一身有母尤應惜負米終如欲出何

辛苦京華二十春枉緣篝火勘窮塵
有才如此吾猶惜未必天終老是人

春分前一日再遊南莊

每從遊賞發詩端草色烟光漸滿欄
興到不辭連日醉春分猶剩幾朝寒
晴邊苑路差宜馬低處花枝欲礙冠
二十四番風信在與公一度一來看

刑曹關內馬公出知杭州謹呈古體一首

名賢展經綸動與事權會何當量才地屑屑較儕輩明
公蘊蓄竒出手世無對關中昨寇亂豕突掩不戒公時
在鄉閭倉卒發雄槩一呼集義勇指畫定向肯登陣氣
勢壯強賊逡巡退守土非無人儒生握成敗上功得州
牧報績果稱最迴翔歷曹郎再使聲華沛蔚州老司寇
許予少置喙推公賢且能謂足歷當代昨來權北關吾
杭扼要害流風揖士子積弊剔駟僇至今蔽芾棠勿剪
頌遺愛大廷崇吏治一例視中外此郡復煩公托付意
有在府治統九城東南江海滙連山際西北中畫吳越
界繁華昔或然疾苦今百倍婦女力蠶桑丁男勤耜耒
先時辦公稅絲穀長早賣供億苦多門奸胥巧科派弱

同几上肉色有豐年菜况今兵燹餘水旱互癘瘡千里
水陸衝六年轉輸憊稍期甦喘息亟望爬瘡疥租從
巡幸蠲圖覬流亡繪公今乘傳出膏雨行當霈兒童騎
竹迎父老扶杖拜賤子本部民饑驅走邊塞歸耕自茲
決直欲從公邁

上巳後二日同楊端木出彰義門次日抵涿州
馬上口占

放慢遊韉信意行不教馬力困兼程草低天遠盧龍塞
柳暗烟濃涿鹿城遷次心情移客夢蹉跎鄉社負躬耕
杏花開過清明節猶記橫簫聽賣錫

奉陪朱大司空松林看杏花同吳楞香許時菴

王薛澱吳匪菴諸公分韻二首

偶逐肩輿出郭行，蹇驢斜照一鞭橫。
平分節物歸僧舍，背指風沙帶帝城。
好鳥啼能添野趣，晚花開及向春晴。
作詩自取排吟興，何必留題識姓名。

煖烟濃靄互交加，樹裏孤亭四面遮。
杏酪已調初改火，松濤忽瀉正烹茶。
內官老作茆菴主，遠客閒看禁苑花。

果園已屬內廷多謝東風不相笑，一枝歸壓帽簷斜。

鳳阿山房詩爲侯大年題冊

畫葉吟多手自芟，桐花昨夜夢千巖。
羽毛大好君應惜，從此歸飛正不凡。

送徐毅庵歸梅里

綠槐陰下一條街五度東風感計偕路盡始知村舍好
調孤肯與俗工諧雲開馬首重經嶽毅菴歸途將登泰山絮暖鯨
魚恰渡淮想到溪南好風日家人已製筓皮鞵毅菴不喜著鞵

故云

送祝彥方落第南還

來何艸艸去匆匆帝里春殘悵別同歸燕吟成芳草外
跨驢人老落花中枉緣腰扇遮西日悔逐烏裘障北風
駱賓王詩烏裘十往還勸爾一杯須作達畫眉何取入時工

次德尹見懷原韻二首

倦飛無力出風塵每對來書輒損神失路又成三歲別
賣文何補一家貧浮生泛梗仍孤影上苑攀花偶故人

多少五陵裘馬地等閒狼籍路傷春

爛醉旗亭得幾場鄉愁如海詎勝量花紅村社巢邊燕
草綠春陂雨後羊每送歸人因得句漸消奇氣不成狂
便思短策飄然去檢點征袍已入霜

送楊耑木歸里兼寄朱日觀錢昭平朱與三王

子穎陳補思寄齋諸同學

悵斷河梁又一回留真無策去徘徊笑能傾國時方妬
曲到知音調始哀別語感君如骨肉故人疑我竟塵埃
相逢爲話狂猶昔只是生疎酒伴來

端陽後一日同人集朱竹垞表兄齋分韻

愛君庭戶清絕比似長松夏寒荷柄香含風幔櫻珠紅

吐米盤間人不妨鬥酒樂事無如去官同是江湖倦翼
可憐萍聚長安

送郭臯旭歸平湖

屢卜行期又屢愆一官空憶廣文壇飽經世味貪歸路
老傷時名狎少年席帽白堆蓬鬢雪布帆青入柘湖天
倦遊未必非良策方頃烟波待釣船

畢鐵嵐僉事將督學貴州枉問黔中風土短章
奉荅兼以送行

浪遊我昨趨黔境一線乾坤歎躑躅辱公就我來問塗
臨別能無片言贈此邦風物口能說筆墨形容反難罄
但從記憶得大凡一一舟車往堪證荒程杳邈六千里

冷署蒼涼十三郡荒山無樹茅紛披亂水分溪石綿亘
金蠶閃閃夜放蠱苦霧濛濛晝埋甓經過密箐偶逢人
雙眼睚眦語難聽裹頭黑羅氍覆膝赤脚花苗裙及脛
呼同山鳥似有名籍錄官司總無姓其中一二稍秀拔
畧解詩書誦賢聖憑將流寓較土著有似蓬麻草中勁
卅年况復兩遘亂子子殘黎偶然剩此時收斂加冠巾
亟賴名賢計安定先生制莩傳海內

括家家奉龜鏡

去年選曹得兩浙私為鄉人喜稱慶

公赴銓選初除浙江學使已而改授

朝廷有意變成格使者移官膺

後命勿輕荒微愁遠

宦此去依然執文柄五丁力在山為開尚闢蠶叢作蹊
徑苗民雖頑亦人類向化何嘗絕天性從來教養視人

事豈調聲呼無響應幕中浦郎傅功况才士唱和溪山
好乘興公聞此語當鞦韆然快束行裝倚鞭銳

送葛受箕赴建陽丞

南行風土近鄉關路轉三衢第幾灣簿領老除新佐貳
幔亭天與好溪山松間日影哦詩過花下文書判尾還
葛工楷書如此襟期原不俗宦途有味是蕭閒

喜外舅陸射山先生至都六月望後爲先生初
度同學數子置酒容園爲壽敬賦長句四首以

侑觴

幾遍芒鞋踏帝畿星埃頭上片雲飛漸除豪氣終違俗
纔卸行裝便憶歸晚節尚餘文筆在舊遊併覺酒人稀

清時肯擅徵君目收取聲名待拂衣

夜夜星明處士天青山高臥奈無緣
癸辛志每隨行笈
甲子詩多入紀年未定草堂天寶後
就荒松徑義熙前
身為甫里先生裔莫笑貧無一稜田

陸魯望詩我本曾無一稜田

小別回頭又隔年重瞻鬚髮轉蒼然
採芝園綺今無伴
善飯江湖老亦仙簾閣日長棋算劫
荷陰人去鶴看船
過從最憶須雲閣老樹濃陰庇亂蟬
尊酒名園借榻餘眼中泉石自清腴
同來我亦辭巢燕
暫止人猶愛屋烏新沐頭輕從髮
禿穿花步穩倩藜扶
尚平此日差無累懷袖親攜五岳圖

送李蒙山回嘉禾任次外舅韻二首

斂弦歌罷水風涼
碧野秋遲未剪霜
報道今年官酒賤
公畦小稜林花香

衣裘容易改寒暄
來往無端閱使軒
歸夢隨君到蘋末
白鷗飛處是田園

苦雨次少司馬楊以齋先生原韻二首

連旬暑雨不曾休
邸舍焚香兀自愁
猶勝万重烟瘴裏
五年三伏滯炎州

剝啄聲稀退食堂
生衣十日透新涼
閒中筆墨能添潤
一桁簾波潑硯光

東朱竹垞表兄時移居古藤書屋

整妮牙籤萬卷餘
誰言家具少于車
儵居會向春明宅

好借君家善本書

宋次道居春明坊家多藏書皆校三五編推為善本土大夫喜讀書者多

居其側以便借抄當時春明
宅子比他處誠宜常高一倍

訓別鄭寒村

闌風伏雨兼旬臥晴路一鈎新月破簾前暑退得新涼
門外泥深成堦坳此時有客過言別蹙蹙毛驢壓歸馱
囊空隣酒賒不來醒眼相看但愁坐一篇削藁辱佳序

寒村臨行為余
序慎旃二集

七字留詩慙屬和余才矣陋非爾敵強

以珠璣承咳唾雨東同學屈指論徃徃傳經接師座

與余

寒村俱
出黃門

故人再與瀛洲選

謂介眉為
柱兩太史

一鄭滎陽尚摧挫

失群行李獨淹泊有價文章久傳播燕山此度六徃來
未免征衫被塵浣干時少術非爾病當路無援是誰過

向來人盡棄所長遠到君能見其大古人可作迺殊代
同調相求凡幾箇勿將時命較窮通只許才名出寒餓
羨君有志成果決笑我無端逐游惰偶逢知己私自嘆
每送歸人輒相賀荆榛滿地羊觸藩日月周天蟻旋磨
故鄉樂事殊可憶欲往從之正無那秋風一騎不可留
八月江田熟香粳

范性華徵君屬題陳憐小影

小像沉香手自熏前期如夢却疑真五湖忍負閒風月
爲少扁舟共載人

送聲山姪之湖口二首

自憐萍梗尚京華勸爾江湖飯好加南北豈堪頻送別

去留等是未還家遠書到眼秋垂泪

時聞翰荒兄
長沙詩信

隻影

挑燈夜落花如許流光真痛惜校量何計穩生涯

萬頃波心坐白鷗一天涼雨到扁舟三年廬阜虛前約

往在南昌與聾山相
約入匡廬度歲不累

兩度潯陽感舊遊帆葉依依重入

夢蘆花瑟瑟正交秋青衫尚洒琵琶泣那得平銷我輩

愁

墮馬歌為朱悔人賦用李茶陵集中韻

朱髯別家久不歸如鳥羽倦猶孤飛踵決曾穿雪中履

綫綻未補秋來衣長安城中多第宅年少翩翩好裙屐

青絲絡馬裝馬鞍騎出從誇新買得髯乎足不出戶庭

塵高十丈看橫行忽然欲詣良友酌正坐倚壁空餅罌

蹇驢力小不任重性命敢謂男兒輕牽來未識北馬性
借得大感東家情掀髯却上跨韉坐掣雷流星一鞭過
此時逸足縱莫收造父旁觀巧難佐跡馳駕馭良匪易
馬上人從馬前隋鏡中欲博齟齬咲賦裏偏憎插花賀
康莊大道城西阿失足何必皆坡陀有生所事非意料
未許輕薄相嘲訶當年頗怪王處仲曾爲伏櫪生悲歌
虎頭失計始投筆猿臂何物誇橫戈不如漢陰歸閉戶
安穩生涯信徒步未成矯矯鶴南飛那免煢煢兔西顧
夕陽牛背輸牧豎夜雨蘆中負漁父故人乘車爾戴笠
此作叅軍彼主簿天生爾以不羈才困躓風塵是誰誤
眼前只作墮馬看一跌無端豈終仆印須肯赴舟子招

敬業堂詩集卷六
將伯誰爲輔車助我生鹵莽事奔走屈指歎崎經畏路
尚逐他人肥馬塵浪遊此出凡三度似聞樊圃限狂夫
便合因君警晨暮

上少司成徐蘋村先生二首

數仞宮牆入望新鼓鐘相應在成均何期當路心猶折
如此憐才意始真魚鬣欲騰燒後尾琴材偏賞爨餘薪
百川東下何須問賴有狂瀾手障人

韓愈猶居博士員風流此外孰隨肩來叅講幄三千士
及聽聲華四十年樂地不踰名教外人才都定咲談前
讀書射獵論初志直爲從公願執鞭

送周雪客赴太原藩幕兼訊安邑丞陳六謙

半年裙屐軟紅塵旅橐多緣好事貧手板老方除佐領
幕僚古亦屈才人巖關夜度荒雞月絕塞秋高一雁賓
投轄舊遊豪氣在莫將俗吏視陳遵

題張漢瞻望雲圖兼送其歸膠城

風流取相賞至性關感動我交天下賢孝友得張仲學
成家轉貧母在身愈重長因負米出屢缺晨昏奉天如
憐斯人不忍付寒凍但令邀一第薄少分半俸逋尾戀
慈烏竒毛刷雛鳳中情稍自慰白髮免尸饗如何舉子
場久抑禮部貢賣文給衣食頰首逐儕衆三年長安城
側足塵瀆洞布衣慈母綫風裂秋來縫坐遣望雲心時
時結飛夢誰從筆墨下寫此肝腸痛披圖見君意我乃

有餘恫平生蓼莪詩廢置忍再誦菽水不逮親偷生復
奚用君今及歸養此樂世罕共板輿隨春遊金經侍晨
諷好與劇雲根靈護手親種

送汪寓昭南歸

國家制科設取士數亦夥苟非得其人撫仕真瑣瑣子
來試南宮命中弦激竒干言屬廷對一一明珠顆謂宜
遂騰上帽壓宮花朶群飛或刺天而子足猶裹束書欲
南下躑躅每未果草草薄遊裝昏昏短檠火半年仍旅
食今始買歸舸一涉仕宦途古人比韉鎖子方當年力
抱負况磊砢更讀十年書識老才亦頗井然見經濟歷
試靡不可得第未得官於遇非輒軻子如歎失意何地

更處我

送何雪神宰溧陽

嶺表才名久，軼倫一官江。界去逡巡五千里，外飛鳧地。
三十年來謁選人，可有孟郊爲縣尉。長容閱貢作州民，
謂宋鳴琴以外無公事。花氣能銷簿領塵，
梅知

周廣庵編修席上分賦秋蘆十六韻

秋入江湖濶，天連葭菼荒。懷人方渺渺，極目但蒼蒼。搖
落空洲畔，參差枉渚傍。拂莖看漸老，抽笋記初長。露壓
梢梢重，聲添葉葉涼。戰風迴折戟，溜雨得沈槍。寒水依
痕靜，殘暉弄影忙。白疑先挾雪，青愛乍經霜。暗浦菰交
暝，沙田稻映黃。就橋迷蟹斲，引路入漁莊。錯莫招窮士

延緣阻一方寒蟬遺晚蛻遠雁落斜行鬢策悲辭漢琵琶怨嫁商托根隨地有薄植過時傷織箔思蠶事編簾隔草堂刺船如有約吾興在滄浪

秋夜集古藤書屋時梁藥亭將歸南海聯句送

行此首亦刻曝書亭集

露葉倦未飄雲鴻遠相引朱竹垞星埃感蓬勃物候變淒

緊湯西庄恹恹八達達有客發修軫悔餘僕夫在郊垆稌

黍被隰眇梁藥亭柅車浮淪瀾舍擢度噫嶙朱雷殷風息

颶海大魚見鯨湯峽猿有時歸南雪終不實查八九月

之交六千里而近梁懷居興雖洽判袂情詎忍朱置酒

青藤陰入門走蛇蚓湯颶颶涼颶動灑灑纖月隱查山

杯深窪匏野菽脆嚼菌梁迎寒笳卷葉戒夜鼓鳴篋朱

談鋒騁趨雄詩械破室窘湯毫毛秋穎脫墨光古香吮

查臨當黯然別且復莞爾哂梁炎瘴固所便眠食勗惟

謹朱行看早梅墊到及蟄蟲蠢湯前期久勿忘鄉夢今

廼準查穆如清風篇持以示均尹梁

再送梁藥亭次大治司農原韻

草低天遠見牛羊九月燕山早得霜去國一樽秋惜別
入時雙黛老羞長飛鴻與作書空字落葉輕如度嶺裝
一物差堪銷客况難拋鄉味是賓郎

王黃湄給諫屬題紅袖烏絲圖二首

十級丹梯百媚城小欄高下得芳情美人一笑花齊放

為報毫端鍊句成

橫幅看題幼婦辭箇中多識背時宜只除一事曾瞞却

諫草焚來不遣知

重陽後一日長椿寺讌集聯句此首已刻曝書亭集今附錄

九日倏已過姜西溟濕雲漫四郊森森長雨垂朱竹垞颯颯

虛檐拗病葉戀冷枝梁藥亭驚鳥盤空巢晨興踐夙約陸射

山攬袂皆貧交勝引雙樹林魏禹平宛若深山均藤綰三

秋蛇張漢瞻槐舞千歲蛟頰柿迸露實朱悔人金英坼霜苞

紅的的吳萸陳叔毅碧茸茸秦苕在溝竄鼯湯西厓戶網

牽蠨蛸蘚深鬣鬣伏查悔餘篆古蒲牢哮粥魚晝浩浩俞大

文墻雞午膠膠光景歛明晦姜眺覽窮槽櫟新耐綠滿

竿朱晚菘黃充庖豈意青豆房梁俄頃羅嘉肴鳴薑臄

紫蟹陸題糕餘彩貓子鵝新韭配魏鮮鯽枯荷包已見

雉膏登張况有兔首魚分曹玉鈎射朱角力骰盤拋急

觴易沈頓陳緩帶便爬抓一飲動一石湯載號或載呶

同聲唱者和查含意漆在膠五言乍妥貼俞十手爭傳

鈔雖乏韶濩音姜宥使下里鞞合并洵匪易朱顧我中

心恟歸帆艤舳舫梁別騎籠鞅鞞邈迤陟荒岡陸邪許

拳長笑免泣卞和璞魏且誅宋玉茅中縛不借履張泉

酌号然匏檳榔蕉柳荔朱都蔗菱菰茨雞頭祖竹萌陳

翠羽官梅梢熟知江鄉樂湯莫厭潮田礲招隱丘中琴

查勵志賁上交豈必馬足塵俞逐逐營斗筭姜

送侯大年歸膠城

惠子春深跨白驢惠元龍歸吳季鷹秋晚憶蓴鱸張漢瞻歸嘉定窮

歸甌粵吟詩客高雲客還閩老奉龍舒養母圖方田伯返桐城過闕

梁鴻仍感噫梁藥亭歸嶺外多才王勃尚江湖王孟穀自楚入滇君今

又掛南帆去寂莫黃公舊酒壚

顧培園宮贊寓齋燈下賞菊探韻限為字

劈牋重和去秋詩葉底花前榻未移却對清尊驚候晚

尚留名種愛開遲閒情特許攜燈就畫葉猶煩蘸筆為

莫話陶家三徑事年年此景負東籬

劉雨峯兼隱齋小集

四門稱博士五載住京華客醉新支俸庭開手種花塵

埃何處着書帙逐年加不道成兼隱官清只似家

禹平南歸詩以志別

辛苦論交地追歡得幾回却忘吾久滯翻望爾重來才
恐隨年退眉還仗酒開知音真有數流俗任相猜

燕臺歲寒雅集同王后張錢越江顧九恒彭椒
品吳萬子孫愷似王崑繩錢玉友徐子貞高遠
修孫子未王巖士陳叔毅湯西厓談未菴馮文
子俞大文家荊州作二首

一天殘雪冷晴暉高會金臺近已稀我輩論交終落落
他鄉對酒倍依依蒼茫敢信前期在輕薄翻疑古道非
得路何人能折節向來同學儘輕肥

敬業堂詩集卷六
三
檐花檐雨夜沈沈猶憶年時載酒尋忽漫回頭成昨夢
每從失路檢初心殘碁吳越尊前壘短褐冰霜歲晚吟
同調尚留公等在敢憑餘子說知音

偶過史胄司編修齋賦贈

每從朝退得閒情深卷稀傳剝啄聲視草才矜編集富
簪花格愛學書成茁來玉樹枝枝秀賞到冰壺事事清
怪得官清能下士五年前是一諸生

敬業堂詩集卷六

敬業堂詩集卷七

海寧 查慎行 悔餘

假館集下

起丙寅正月盡十月

寄題宋漫堂觀察園亭六絕句

村烟雨外青沙草
岼頭碧欲知
春淺深風到
鱗鱗活

綠波村

菱角初翻刺
雞頭未剝圓
涼風吹酒醒
人上過溪船

芰梁

春水綠于頭
春花紅似掌
漸次去人遙
鳧鷖雜三兩

放鴨亭

團瓢不鬻茅
擁蓋松陰下
茶熟正吟詩
風濤入懷瀉

和松菴

魚篷閣淺灘閒却絲綸手長被酒家翁紅腮偷貫柳

釣家

白鳥點蒼葭沿流畧釣斜愛他丞相第簾箔似村家

即文

康公舊居也

緯蕭草堂

送顧九恒南歸

柳汁春回翠滴衣羽毛雖好奈孤飛行期屢改今才決
同調無多去轉稀換眼舊遊隨夢散掃眉新樣入宮非
杏園已是攀花客終勝初程下第歸

俞大文出都同人祖席分韻得郎字

客中送客春茫茫投牀夜夢得故鄉

前五日九
恒別去

旬來怕

聽叩門別君又結束匆匆裝出都贈行例有句况我與

子情難忘我時正坐作詩瘦不耐冷淡搜枯腸典衣且

復就劇飲醉後亂發如風狂憶君年當十五六談笑目

已無盧王曾蒙佳什盛許予駘鴛鴦下非敢當

辛亥秋
大文賦

駿馬篇
見贈

厚意寧能久不報積逋耿耿今粗償識君最早

莫如我只恨岐路趨殊方萍踪一散十三載兩曜轉轂

驅星霜班荆故國再相見孝廉船繫禾城傍才人生還

話絕域詞客遠別歌河梁

以上敘癸亥春與大文攜謙
同集吳漢槎鴛鴦湖寓樓事

片帆湖口浪滾滾匹馬薊北冰礧礧來酒市並做舍

我極潦倒君飛揚故人聯翩貢禮部屈指仇

滄柱

顧九

徐子貞陳廣陵汪寓昭君於其間最年少爭看白面翁

家郎風擡袍袖綠陰合花壓帽影紅綾香文章自足取

高第仕宦何必皆巖廊旁觀愛才或太息達士安命無

摧傷鑿輿昨者東幸魯曠典百代傳輝煌君今應聘

往纂述豈異扈蹕來登堂直從國書採鉅麗不比家乘

搜散亡誰云小試著作手會見奎壁垂天章時大文應

纂修幸魯盛典偶然便道一返里山青雲白遙相望眼前合并

那易得歸興未抵離愁長鞭鞘已出軟塵外裊裊絲路

穿垂楊

移居詩為姜西溟作

自我來都城三見君移居前年街東住夕陽到庭除殘

冬徙巷南北戶風攪裾今臨大街西朝日明窗疏短生
寄長世天地猶蘧廬矧乃一榻安藹藹良有餘君才本
絕代應 名來公車姓名上史館著作登石渠太倉五
升米既飽同驩娛漆光拭修髯外澤中不枯有時典裘
褐間架如期輸卷軸不用籤錯置圖與書偶從移居候
整娖驅蟬魚經旬復成堆零亂巾箱厨即此見真率寧
能事奔趨朱門曠蕩開無地置爾軀請看名山業終古
歸繩樞

王忍亭主事招遊相國宛平公怡園二首

沙路開三徑名園甲九州不緣君愛士那得客同遊好
鳥來宮樹春冰落御溝野人雙眼豁初見 賜書樓

敬業堂言集卷七
見說門前路鳴騶日日來簇燈春宴罷踏鼓早朝回華
萼居相望平泉第對開從來論相業原不廢亭臺

上大司成翁鐵菴先生

虞山龍蜿蜒昂首挹海若滙爲人文藪壇與代有作我
公實名家間世出騰躍却將波瀾勢捲起向寥廓國家
取士途 括制仍昨後生奉師程體裁就拘縛蠶叢嶠
負固斤斧孰開鑿巨手得韓歐呀然啟鐫鑰文昌一星
曜餘若螢火爝以此結 主知迴翔上館閣十年執文
枋出入兩不忤東郡昔掄材雲羅恣搜索遂令齊魯風
一變起積弱至今劔光在識者辨干莫文運際中天四
方視太學頗聞長老語斯地久寂寞篋篋器空懸豆籩

禮猶託春秋刳羊豕朔望奠羊爵四門官俸輕六館廩
餼削惟留古時栢枝榦尚盤礴花甌饑啄鷹鬥棋暮巢
雀庭荒狐狸竄人去蝙蝠掠壁書畫摧殘獵碣字剝落
偏傍按點黜星隕不可攬自從 萬乘臨廟貌再丹雘
臯丛位祭酒此座不輕著新城轉官去士氣孰聯絡公
來一震聳造就拍不各外貌謙以和中懷嚴且恪從公
日于邁人有執經樂園橋看濟濟在泮咏躑躑方當發
賁鏞豈獨警道鐸三千萃絃誦餘地故綽綽移時具規
撫次第布條約經術植本根史書覽大畧詞章及文藝
餘事柎承萼必若計栽培先須破根柢力圖古制復事
異虛名博煦者春達萌釋如秋解穽時情重成例清議

敬業堂詩集卷七
四
動多格憐才出至性此意感非薄賤子望塵來三年客
京洛門墻雖濫廁鞭策稍知懼公于汲引塗取予必斟
酌何期納百谷亦復收一勺傾僚方自茲惟公鑒葵藿
清明日同玉友荊州出右安門就旗亭買醉晚
至朱大司空花莊復留劇飲即事四首

新烟淡淡柳梳梳
雨洗輕塵出郭初
遠客不知京國好
酒旗風裏話田廬

三鴉岐路小車歸
一曲花遊簇作圍
春色盡隨紅艷隊
明朝蛺蝶滿城飛

聯鞍緩鞚去逡巡
覓句沈吟苦鬥新
忽漫詩成狂拍手
墮鞭驚起馬頭塵

典衣偶出爲尋春重向名園叙主賓慙愧公卿傳好事
一時狂號屬三人

摩訶菴看杏花次司空公原韻

壺盧酒熟鳥催提路轉松迴別有蹊艷入繁枝停畫鼓
淡教微雨洗花泥開遲翻悔來看早興好方嫌飲量低
却被閒僧嗤好事一雙蠟屐舊曾攜

三月三日朱大司空招集南莊限三字

一旬雨雪春淹淹餘寒尚殢三月三滿城花信近桃李
客舍冷落思江南司空園亭傍水際初已有約來停驂
郊原霽色忽入眼豁若明鏡初開函草凝露光翠撲撲
柳披風勢青參參檐牙燕巢看新補枝亞雀殼俛可探

蘭亭勝事俗久廢京洛良會情尤耽
轆轤轉水百尺底繞砌曲折歸澄潭
不須絲竹發豪興自有風雅供清談
銅壺靜傳竹箭響蠻榼遠費桃枝擔
先生名高暫解組公子官好能抽簪
閒從門生諸公皆先生門下士奉几杖猶許野
服來相叅古道力持公自厚群賢不鄙
余懷慙久留帝鄉亦何爲土俗節次差
能諳放鐘撇卯等兒戲歲月過隙真奚
堪大杯一澆壘塊散得飲且復拚沈酣
前期更有聽鶯約預辦斗酒攜雙柑

喬石林侍讀一峰草堂看花同外舅陸先生朱
十表兄錢越江周青士孫愷似湯西厓分韻

愛花成癖不待招春來徧踏東西郊起聞啼鳩送春去

猶跨短鞵搖吟鞞斜街草堂地清絕瘦藤當戶挈老蛟
土牆面面紅窄堵沙徑曲曲青盤坳礬頭暗皺高下石
亭子乍翦離披茅巧從陰借桃李杏惜少水養菰蘆菱
棠梨素粧太淺澹繁蓋亂拆丁香苞新開海棠好顏色
兩樹氣壓千花梢主人爲言初買得舊根帶土枯蒲包
擔頭親爲解其縛位置特許依書巢栽培本關造物意
人事未盡休輕嘲醵泉口嘗手自灌及見紅艷青葱交
他人買園身不到君乃僦屋情難拋花時連日得休沐
剝啄有客門頻敲行攜几榻隨分設野藪蒸薺樽窪匏
偶然興到觸佳句已被萬手爭傳抄我詩不工強屬和
出語毋乃同號嗽不成甘受金谷罰忍負新月垂弓弣

是夕再飲嚴夔菴侍御鸞枝花下三首

賣花聲裏過斜街不記招尋月幾回只有繡衣真愛客
印泥封酒必同開

僦居喜近慈仁寺移得鸞枝隔歲栽報道退朝今日早
東欄昨夜有花開

矇矓眼纈隔窗紗曾入東隣學士家一醉竟須煩二主
可憐頻對客邊花

送叔毅南歸即次留別原韵三首

到處誰當却掃迎去留此際計非輕自收詩上還山集
何取人傳入洛名三世羨君猶共爨百年爲客總勞生
豈應陳孺長貧賤如許鬚眉徹骨清

竭來挾瑟並燕中
廡下猶欣傷伯通
謂嬖儘有狂言容

數子每從高會廁
諸公淋漓醉射東
方覆蹠蹠群看北

野空恰恰酒人從
此散一天無賴柳
綿風九恒大文未

後出

敝廬好在龍山下
藤蔓花梢一一垂
春草池塘空入夢

德尹復瀧岡窰空杳無期
封書病檢山妻藥
陳筴慵探

季子錐百念因君
多撥觸最愁人是
望鄉時

重過摩訶菴老僧
以新茶見餉

細色網從馬上催
筠籠先為老僧開
鬢絲禪榻前因在

直愛茶烟又一來

慈壽寺

摩訶菴西慈壽寺老樹盤礴爭奇雄當門古塔少梯級
合沓直上烟霄空迴廊二千五百步一一畫壁堆青紅
仙山鬼府靡不有搜神志怪殊未工雲旗飄飄翳白日
闕殿肅肅來陰風不知茲寺創何代負墻古佛塵相蒙
居僧兩三乞食去好事欲問嗟無從手揩雙眼看碑碣
歲月却記明神宗是時海內際清晏嗣皇冕藻年方冲
雞鳴問寢駐銅輦瑞蓮獻賦歸新宮萬曆初年瑞蓮產
慈寧新宮閣臣申
時行王錫爵俱作賦一朝家法古無匹聖母不在垂簾中偶營紺
宇祝萬壽未可概議物力窮百餘年來就頽廢鐘鼓尚
與隣菴通君不見內官葬域抱山麓異時祠廟還穹窿

夜宿養素堂東偏

裊裊一枝藤疎疎幾行柳籬落吐燈光鄰家猶賣酒

秘魔崖古栢長二尺許俗傳隋仁壽中盧師手

植

連岡東北轉鬼物托幽秘瞰空飛一片石縫舒右臂老
鴉銜栢子偶向駢拇隊飛泉難仰流長此擘拳翠相傳
閱千載僅可二尺計勒龕誇佛力此語吾所鄙猥蒙雨
露恩竟負栽培意兒童斤斧脫大匠棟梁棄寧非干霄
姿吁嗟守憔悴

從磨石口至翠雲菴

亂山中有崎嶇路時聽征車撼石聲行過翠雲塵乍少
馬頭麥浪綠初成

立夏前一夕大雷雨宿西山麓

臥聞風雨聲惜此花間路沙路不成泥披披曉窗霧猶
嫌入山淺未到雲生處

日涉園送春

驚雷掣雷夜窗明忽轉雲頭又放晴夢裏似曾聽雨過
曉來不礙看山行紅衣匝地枝枝瘦翠幄支天葉葉清
遊興有餘春向盡暫時經眼倍關情

早發杏子口暮至香山

西山灣環勢向東兩角到地形垂弓客從山南走山北
耳畔箭激颼颼風苔遙一程晚始達喘汗未定馬力窮
入門翻愁磴曲折落澗已愛泉琤琤居僧指點最高頂

十里近與前岡通冥冥一綫縈萬丈蜀鳥飛去啼春紅
人間何處無捷徑失足怕落荆榛叢吾寧迂遲就坦道
肯試竒險爭樵童殿西一軒得空曠雲根倒插下積空
夕陽將墜尚未墜數峰晴意憑欄中回頭却望來處路
已被遠樹遮溟濛

再宿來青軒

景物蒼茫感舊秋

甲子曾宿此軒

還將筋力試重遊行穿下下

高高路題徧山山寺寺樓捲幔微風香忽到瞰床新月
雨初收洗空塵土三年夢一夜鳴泉傍枕流

山下有泉名甘露

永安寺頻婆花下

啼鳩聲中日向斜閉門春盡似村家黃蜂飛過短牆去

零落頻婆兩樹花

從洪光寺下十八盤取道而歸

洪光我昨到石徑盤曉纈不知眼界寬但覺足力費茲

遊及晴爽勝境天所乞去聲泠泠松上風倒洒泉泌沸路

窮寺門出氣象非昔謂關河劃然分有若列涇渭平疇

綦布罽萬象經錯緯舊遊領新得噉蔗飫餘味重尋周

歷處畫像儼中貴寺為正統朝太監鄭同所建按碑記約費七十万輝輝金碧

光尚壓一山氣峰高此為最興盡我猶未何當躡其巔

西覽韓趙魏

訓陳子文安邑見懷之作

新詩讀罷一摧顏何限心期悵望間塞柳關榆遮不斷

數峰春雪太行山

白芍藥和孔心一少叅二首

扶頭一笑粉生光
鏡裏匆匆看改粧
金餅賺來初罷浴
瑤階行過但聞香
含嬌似爾情難禁
太潔從人忌不妨
莫向中書誇故事
素心羞對紫薇郎

便從姑射擬肌膚
那許餘容伴鼠姑
美酒對傾金鑿落
佳名果稱玉盤盃
鶴翎舞拂新時樣
獺髓痕消舊日圖
珍重一襟冰雪意
殘紅掃地近來無

送湯西厓南歸兼寄嚴定隅

古寺槐交陰微陽轉
冰簟上與君初握手
片語示肝膽
來當傾蓋新久覺
忘形漸相過
日不隔懷抱
兩無忝狂

言我難緘嬾病子未減彌縫補其闕瑕類肯互掩子才
隨地湧百斛走歛灑屈首舉子場十年困習坎隻身泝
瀟湘盛氣生勇敢歸來翻一笑函匣劍光閃未免爲時
名束身就繩檢酒徒遇燕市搖落自多感兒曹太輕薄
載鬼白日魘榆搶斥鷃如冠著沐猴儼彼頑何足校我
白故無玷稍恨素心人晨星散疎點金溝送別處屢見
風柳颭子來辭我行忽若猿出檻足矜行卷富何礙歸
裴儉溪堂行補苴湖舫待剡剡開籬受竹色擇石置崖
穴青萋鴨脚葵白剝鵠頭茨隣沽貫新熟詩韻鬥竒險
此樂吾久疎歲月徒荏苒雨堂倘問訊應惜緇塵染

閏夏飲竹垞表兄古藤書屋限藤檉二字各成

五律二首

曲巷居相近迴欄到每憑爽開尋丈地陰合兩邊藤幽
事披襟愜新詩計卷增

時竹垞騰
咲集初成

醉探杯底綠涼影落

層層

碧草柔牽蔓紅花細着檉客稀成雅集屋老稱佳名淥
淥雲催暮疎疎雨放晴家園風景似只是少啼鶯

雨後龔蘅圃攜酒古藤書屋分韻得能字

結隣君最好旁舍綠陰增榻愛同時設門教一僕應異
書便借看新句急催徵許我時相就衝泥到亦能

曲阜顏母朱太夫人壽讌詩修來吏部屬賦四

首

玉女峰連泰岱青人傳翁主是前星朱門昨夢滄桑變
白首餘年患難經禴翟恩曾邀北闕扶搖風又徙南溟
勿論陋巷家聲在母德還堪作典刑

郝鍾禮法尚嫌疎从較門風正不如壽母有詩存魯頌
世家無例闕班書五雲扇底分儀仗八座花前侍起居
慙愧潘輿輕作賦金根唐德宗朝趙國公還有嫁時車主下嫁始用金根

車

霞帔重加舊日冠慈顏一咲一加餐從看舞袖迎花誥

猶記傳經傍杏壇吏部文章今卓卓翰林風骨久珊珊

謂淡菴太史

同時丹穴雛皆秀世澤方知擬似難

水天閒話屬葭莩異數曾聞拜舅姑娣姪紛紛齊庶士

門墻一一魯諸儒王姬老去樓仍鳳顏氏歸來巷有烏
不爲尋常誇燕喜八千親寫壽護圖

飛蝗行和少司馬楊公

去冬臘雪不蓋土今歲天行旱畿輔門前有客來故鄉
爲言千里皆飛蝗綠陂青野一時失但見黃雲蔽白日
我聞此語方長歎愁坐不知天宇寬有聲藪藪自南至
驟聽乍疑風雨勢舉頭杲杲燒火輪中庭過影何紛繽
蜻蜓蚱蜢亦群舞倏度宮城齊振羽宮城十丈高巍巍
誰能禁爾漫天飛

武陵楊長蒼重來都下感舊有贈

建業相逢記一樽飛蓬心跡感重論舊家春燕烏衣巷

故國秋仄覆盜門愁倚白頭絲減髻閒繡青史泪交痕
可堪潦倒風塵際還見元和一品孫

送孫少司空督濬下河

神京建西北歲走東南漕去聲轉粟上青天黃河扼其要
元時用海運年久有成效此議今難行將毋物力耗宣
房十年築甯旰煩廊廟千村收竹楨十郡供柳埽百
萬縻金錢一支歸故道吾君如唐堯勲德在覆幬百
神胥受職河伯敢陵暴猶復念民勞南巡趾親到下流
得地勢海口計疏導守紛紛異同論破例寧意料學士居
禁林十年不輕調汝往作朕虞欽哉奉明詔歲輸發
內帑恩澤蒙再造畚鍤興如雲邪許相慰勞和衷事斯

集正氣神可召芄芄黍苗歌可乏陰雨膏渠成萬世利
績待暮年報

送楊筠湄通叅赴任奉天

國家都燕京遠左本根倚東西營鎬洛周制正如此城
闕遙相望關隘紛可指設官重保障未可猛政理阡陌
屯田開戶口豪右徙卅年盡土著烟火變墟里仁人來
撫循爾輩皆赤子

呈少宰董默菴先生二首

丹霄地望絕攀躋尺五城南乃似梯日月文章韓吏部
天人經術董膠西都無半刺通干謁却媿凡才出品題
此日黃金臺畔路不聞伏櫪盡長嘶

敬業堂言集卷七
三
注籍紛紛屬貫魚積薪時論近何如尚煩啟事從容入
及見銓曹次第疏閣下銜仍兼學士殿頭班欲領尚書
文章得路如公少還恐爲儒計或踈

吳門徐彥通來都得惠研溪近問疊紅豆冊舊
韵荅之三首

勞勞別夢短長亭兩度秋風冷畫屏忽聽故人傳尺素
夜長添對一燈青

廢廢愁聽室人歌拚却長程歲月過我已髡毛秋換綠
不知君髮更如何

名園婪尾醉燒春豪氣曾陪末座塵此日青衫尚留滯
蹇驢腰扇怕逢人

次馮文子南歸留別韻

高視沈寥天，俛瞰廣莫野。斂才就實地，始信得力寡。文章技尚卑，矧乃論騷雅。方期木雞養，不礙伏虎啞。讀書滕口說，正坐氣難下。築臺逃文債，支戶辭吟社。靜觀得妙理，擾擾何爲者。因君又多言，餘習吾未舍。

當湖王復園索贈次沈繹堂先生原韻即送其歸

寂寞名山路，蹉跎始自憐。長途添白髮，老眼望青天。夜雨新豐市，秋風下涇田。夢中歸路近，帆卸郭東船。

與顧梁汾舍人次閣學韓公韻

不是微之定牧之，紫薇亭擅舍人辭。十年未就歸田賦。

衆口猶傳赴洛詩，往事相關碁已散。秋風纔到鬢先知。

怪來東閣留賓地，難遣深情是酒卮。

時舍人有七友之痛

九日飲朱大司空南莊二首

雲物蒼涼感鳳城，良辰難遇是晴明。同時那得人偕集。

是日西溟輦集萬柳堂余不及赴

去日渾如客餞行，大漠寒烟凝朔氣。

空林殘葉墮秋聲，籬邊舊是餐英客。省對黃花倍有情。

不是藍田別有莊，三年此地作重陽。先生出郭仍攜酒。

獨客登臺又望鄉，天濶一鵬盤遠勢。風高群雁起斜行。

茱萸諸弟遙相憶，應料新來鬢點霜。

少司馬楊公見和前詩有登臺把酒之句，追憶

落帽臺舊遊已八年矣，再次前韻奉酬二首

迢遞關山隔楚城
亂猿啼處記分明
瘴花瘴草重陽候
秋雨秋風絕徼行
匹馬幾回經戰壘
荒臺三面走江聲
再來京洛追陪地
望遠猶含萬里情

青楓白菊夢漁莊
驚起窗鹵正夕陽
賴有新詩酬好節
敢云游子戀他鄉
風聲捲地迴遼海
山色迎寒入太行
一片清砧聽不得
敝裘容易改星霜

得談未菴沙河書却寄

涼燈四壁光燦此
一雙葢終宵不能寐
詰旦占有喜起
接故人書窗日穿故紙披襟再三讀
感慨忽中起憶昨
初訂交秋風燕市裏
余時新落第邂逅得吾子
子名雖早成尚索長安米
才高氣激直罵座酒頻使我故失意

人謂子不宜爾子行將筮仕鸞鳳棲棘枳縣令古難爲
位在百僚底上官任喜怒下吏望風旨剛者號木強弱
恐隨波靡不卑亦不抗斟酌具至理子才百事能所少
或在此今年子謁選畿輔得百里是時方旱蝗黽勉到
官始單車行就道奴僕躡生趾近聞沙河城善績紛可
紀賦蛇餘毒去政虎隣邑徙保障安流移枹析靜奸宄
神明咏來暮父母歌樂只租稅如期輸蒲鞭免撻捶民
譽慰攸歸官聲被褒美寧非讀書力出手見根抵乃知
賢豪人未可私意擬向來吾錯料失語徒抱耻感子諒
我真肝膽終見委得路念貧交幾人堪屈指自傷志力
薄無以赴知已行當賦歸耕塵俗庶一洗願子益自愛

友道在永矢前期不遐遺折柬到桑梓

次大治司農韻送顧與田還金陵二首

及見開東閣俄聞把別觴沙痕雙髻雪寒色一裘霜老
覺游情倦貧銜故意長獨留青眼在此外任炎涼

一片隨陽雁郵程取次過馬頭回紫塞冰面渡黃河手

寫還丹訣神傷過關歌承平風物似遺老剩元和

奉送少司馬楊公予告養親四首

聖朝孝治在敦倫 詔許還鄉為養親平格已推黃閣

老公今年適周花甲行期先報白頭人卷舒在我何關命進退

無慙好乞身此日魏舒仍襍被却從去國始知貧

從開絕域震餘威悵望多年子舍違退自急流從古少

荷葉詩集卷七
老猶孺慕似公稀東門祖帳傾城出北闕
恩光拜表
歸晝錦堂開春晝永咲將綵服換朝衣

萬事長安一局碁角巾私第未嫌遲即論世道寧無補
欲報君恩况有期春服暫寬腰下組茶烟初驗鬢邊
絲粉榆父老來迎謁應羨精神似舊時

油幕追隨万里過兩年假館又蹉跎吟聯樺燭枝枝跋
酒上塵顏夜夜酡含意每爲知己盡不才真怕受恩多
公歸我客全無爲誰聽荆南寡

和歌
時余將移
館北門

敬業堂詩集卷七

敬業堂詩集卷八

海寧 查慎行 悔餘

人海集

起丙寅十一月
盡戊辰正月

故人吳漢槎歿後有以不肖姓名達於明相國左
右者遂延置門館令子若孫受業焉下榻府西偏
去南城十里而遙人事罕接間有吟咏率出傳題
酬應自丙寅仲冬迄戊辰初春凡十五月所得詩
不滿百篇合爲一卷即用人海記之名以名集

移館北門寒夜不寐起來霜月滿庭有懷諸弟
寒城宮漏永孤館耿無寐起看殘月升稜稜挾霜氣徘徊
夜將半惜此姜肱被獨客不可爲無端感憔悴

荷葉堂言集卷八
題喬石林侍讀梅花莊圖兼送其罷官南歸

湖陂種柳不種梅梅花合向陽陂栽買園舊在最高處
尚怕水泛春冰開沙頭一篙刺歸路清淺今堪跨牛渡
父老來看侍直圖先生咲入花間去

趙秋谷編修見示并門集輒題其後

趙侯曠世才研發新刃初十八取高第姓名登石渠紛
紛冠蓋交僮馬填門閭抗懷對儕俗折節讀古書我友
潛江髯朱悔人數數來告余余時懷一刺欲往還趙趙從
來負盛名相見長恐虛何期就館舍先枉君子輿示我
并門詩璀璨瓊瑤琚清光溢兩目瀏覽無停矚不忍遽
卒讀掩卷姑徐徐留之遣夜長霜月臨窗甃地爐煖宿

酒繼晷編重舒十首醕一杯頃刻百首餘何堪飲戶小
徑醉同遽遽隱几似有人導我蓬萊居李杜踞高坐兩
匆列仙儒依稀潮州韓髣髴眉山蘇中有青丘子拍肩
大聲呼醒來几案傍絳蠟開芙蓉悠然接詩境鼠穴非
乘車我欲數子間位君復踟躇君今富才力著作承明
廬詞章技特卑未足垂聲譽即此見根柢振步捐土苴
神仙才有數此語古有諸我賤不足論願君勉相於

得聲山姪揚州信

隋隄柳又拂歸艫安穩傳書報渡江却寄新詩猶索和
轉憐遊屐不成雙霜欺獨雁寒衝塞月帶疎鐘夜到窗
此際相思倍怊悵燈花何喜燦冬缸

任坦公以趙松雪留犢圖索題留竹垞齋中聞
爲偷兒取去戲作絕句荅之

一呷貪泉盡跣徒壽春遺事近應無探囊莫怪工相妬
占斷清名是畫圖

題禹平水村圖二首

蓼洲疎雨荻洲烟一扇低篷水拍天不礙主人長作客
披圖還有鶴看船

春波十字水西東草淺迴塘有路通着個歸人應更好
倒騎烏特柳陰中

除夕前八日立春

驚心看舊曆三十八回春去日成何事流光惜此辰好

風迴淑氣殘雪洗窮塵便擬騎驢出旗亭覓酒人

元日出東便門

以下
丁卯

朝出國東門言循潞河湄層冰裂厚地雪光照曜之草
短沒燒痕老楊交枯枝晨曦暖我顏我鬢初有絲自從
客京洛三遍東風吹藏身人海中發興乃更竒誰能當
此日一鞭出尋詩

少司馬楊公潞河寓齋夜話得村字

去京三十里城郭只如村老樹排沙磧春帆次水門談
深孤館靜酒罷一爐温已覺連宵夢依依近故園

春夜同外舅陸先生陳夔獻呂彤文許時菴朱
悔人魏禹平王令貽王赤杼吳震一張損持家

荆州兄集朱大司空齋分韻二首

春燈春夕宴一到一回歡不赴先生約寧知禮法寬酒
痕雙短袖歲事五辛盤合坐無生客長安此會難
畫簾開雪後新月到花西雅令投瓊得清歌按拍齊鼓
催今夜醉詩記隔年題預恐鴉啼曙門前散馬蹄

龔蘅圃屬題攝山秋望圖

昔我道金陵西南出江關船頭東北望秀色堆烟鬢長
年爲指似此山名繖山古寺入棲霞松老苔斑斑玲瓏
刻千佛石骨靈不頑上有天開岩鏡平園若環從茲陟
高頂一覽收人寰孫吳事業荒南渡衣冠孱詞客弔興
亡動云清淚潛探懷發深趣此事天寧慳如何雷同聲

萬口若是班我友詩力健清奇寫崢嶸好風颭然來滿
眼除榛菅按詩記年月我在蠻溪灣重披一幅圖點染
紛斑斕杖藜者數輩謂竹垞青士諸君風骨俱珊珊同時失同
遊悵望空往還憑君添一葉置我烟波間

王甥漢臯南歸詩以示別二首

草草嫌輕出依依戀此辰也知歸橐儉應諒客囊貧家
教分諸弟身謀累所親臨期雙淚落併念爾先人

汝去真長策吾留轉寂寥雪燈分袂影風柳斷腸條客
久人情覺春寒酒力消自今長短夢無夜不河橋

送吳青壇侍御歸里

來乘驄馬來去駕柴車去烟光綠上垂楊梢春淺東門

送行處東門多少罷官人太息何煩感直臣但使朝廷
無闕事不妨歸作太平民

北城寒食有懷南郊舊遊寄呈朱大司空並索
玉友荊州和二首

早桃開後倦游情春事無端閱鳳城忽聽賣花聲到耳
始知明日又清明

名園狂醉已經年永定門坊記墮鞭想得出郊重繫馬
一行新柳變新烟

相國明公新築別業於海淀傷旣度地矣邀余
同遊詩以紀之

路指沙堤外園開海淀東好山西嶺接曲水御溝通

綠野名相稱華林興頗同種花兼種樹還費十年功

陳元亮至得令兄撝謙近問

海棠雨墮胭脂紅一尊醉別禾城東旗亭袞袞柳綿白
握手驚從薊門北烏蟾顧影倏忽移已過五度春風期
看君湖海發豪氣嘆我頭髮生微絲爲言索遊非得已
爾乃胡爲亦來此一門甲第矜貴盛王謝堂前燕添壘
藏書萬卷澤尚新負郭二頃業未徙少游但思騎歛段
儘可浮沉老鄉里天生爾以不羈才伏櫪豈得長徘徊
朝秣吳芻暮燕市聲價自長黃金臺君家髯兄才不細
勇決翻成倦游計粗傳近况喜可知只怪新篇不相寄
故園漸少杜門人徃徃席帽趨黃塵因君長觸草堂夢

蘇東坡詩集卷八
五
綠樹正接詩翁隣

送宋牧仲提刑山東

名封十二接關城繡斧前頭父老迎問俗潛移齊右姓
下車先揖魯諸生天開島日三更白濟入河流一道清
歷下亭邊名士會騷壇行見續詩盟

壽陸菊隱前輩七十二首

熙甫陶菴傳述久百年君又起膠城學能忘世名偏重
老愛讐書眼倍明在璞不妨留王彩出山依舊覺泉清
龍門子弟俱英絕及見淵源有二生

謂孫愷似
侯大年

採芝欲去每相羊開閣猶留老仲翔

時下榻大
治相國家

共許康

成多著述誰言安世有遺亡老人祝杖鳩無恙處士歸

田菊未荒十丈風埃遮不得少微爭拍客星芒

送時菴先生典試四川

驛路曉發聞秋鈴千山萬山疊翠屏秦關百二閱天險

蜀道一雙占使星

同行者爲林戶曹

地遠人才拍可數亂餘風

物愁初經同行有約吾竟負讓爾劔閣題新銘

櫻拂子示兩及門

竟得驅除力群蠅不敢貪清幽吾最羨束縛爾何堪自
愛依書幌差宜挂草菴誤人消底物江左只清談

送田綸霞由大鴻臚巡撫江蘇二首

東南地重推吳會開府新煩典客卿暫出人皆榮八座
再來公已領三旌霜清斧鉞稜稜見風靜驂騮尾尾行

桃李一蹊看好在道傍伏謁半諸生

田曾為江南學使

詔恩連歲蠲逋賦管內民情大可知桐鼓尚傳迎輦曲

竹枝多上去思碑兩賢治蹟原難繼

謂太宗伯湯公一少司馬趙公

代人才更屬誰此去但須持簡要不妨小吏日抄詩

呈玉峯少宗伯徐公四首

書局頻開邸第中桓厨鄴架許誰同一朝典策分明在

未有高文不屬公

宏博今無沈晦倫

御書端為寵儒臣講堂及聽宣和

論感激能容下座人

弟子韓門盛一時投書却悔少年為官高不改憐才意

人道先生似退之

一御何當重李膺對公方媿百無能相逢盡屬龍門客
只是常鱗不敢登

次張超然見懷原韵

昨夜楸庭雨洗埃病餘酒戒擬重開正欣涼自披襟得
忽有風吹好句來榕浦人才君磊落蕁江歸夢我沿洄
此情除共詩翁說

謂竹垞先生

預約藤陰掃碧苔

與時菴別五旬計程當入閩中矣七月十六夜
夢其渡桔栢江有詩見寄醒而作此

相送西南去離心不可降亂山懸客路孤夢墮疎窗暮
雨葭萌驛秋風桔栢江此時占益部真有使星雙

夜宿傳經書屋枕上喜雨

爲少芭蕉樹初來竟不知及聞簷滴後已是酒醒時靜
覺書幃爽涼侵布被宜殘燈如客况不厭作花遲

送周青士南歸

人間不是少知音愛爾蕭然抱素襟潮似歸期還有信
雲雖出岫本無心戰回酒敵黃花老收取詩名白髮深
此去浮家烟水際五湖一葉許誰尋

丁卯秋闈報罷呈諸先輩五首

明明跂脚有青雲安上門前路忽分湖海伏龍雷起蟄
關山斷雁雨呼群裹茸欲落霜花吐燭跋初消漏點聞
慙愧上書頻見斥僅留舌在敢論文

夜雨鳴雞事不同也曾投筆學從戎早知有命應藏拙

不是無家轉諱窮，楓葉飄殘砧杵月。槐花吹過，鬢絲風

故人底，用慙高第。

謂后張仲夔
令詒西厓輩

我比劉蕡策未工。

憔悴青衫感弟兄，勿將時論擬縱橫。五經何負掄材意，

萬口先傳下第名。

時家荊州以
五經被薦

但使低顏對僮僕，猶容

長揖見公卿。祇嫌鏡裏流光速，白髮新抽一兩莖。

兩眉愁思一含顰，情到無繆去任均。短筵聲悽霜後竹，

孤桐絃冷爨餘薪。那能造物皆如意，不信憐才竟少人。

任是亡羊吾勿悔，燈前故策試重陳。

三年光景易蹉跎，又偏登高節物過。燕子生涯如客樣，

菊花天氣奈霜何。狂名幸免聊隨俗，野性無拘一放歌。

已買吟瓢租蹇衛，西山遊興近來多。

荷葉堂詩集卷八
九日同荊州兄遊趙恒夫給練寄園

縈成曲磴疊成岡高着樓臺短着墻
花氣清如初過雨樹陰濃愛未經霜
熟遊不受園丁拒放眼從驚客路長
亦有東籬歸不得四年京洛共重陽

題宋石門畫松

蒼髯翠鬣搖向空老榦蟠作青虬龍
雙睛未點飛不得時有雲氣來相從
開時高陰散林麓捲起生綃纜尺幅
人間何處着秋風昨夜城南拔喬木

秋夜紀事

城頭落星大於斗群犬吠怪都狂走
或云此星作狗形犬不見星惟見狗
初如地震如雷鳴頃刻闐寂天無聲

但見明河亘天月西沒宮漏杳杳傳三更明朝屬車行
射鹿旌幟照山馬異谷不須更載獫狁驕驅爾向前飛
食肉

送朱千仞之任舒城

龍舒傳舊俗淳朴羨民風官稅如期納山田比歲豐月
依琴榻靜花傍印牀紅却咲眉山老無緣作寓公

相國明公壽讌詩四章

海嶽遙瞻壽域開喬松直上表崔嵬立鰲一柱承中極
戴斗三星指上台雨露恩深和鼉地風雲力展濟時才
穆清垂拱邊烽靜誰挽昇平氣象迴

千古明良不數逢天教元老際時雍和衷事事歸無我

雅量人人服有容地峻不須銘客座官清豈在却堂封
但看退食委蛇度賸得丹心荅九重

未應風月屬平章綠野仍開舊日堂玉燭年調光宅里
沙隄柳合善和坊門無鈴鼓軒車靜架有圖書御墨
香一桁朝衣雙進酒森森玉樹又成行

八千歲裏紀春秋平格端從運會留寶鼎有光騰玉鉉
皇圖無闕指金甌朝家望久尊黃髮事業公今尚黑頭
慙愧受知同國士嵩高一頌恐難酬

喜唐實君至

風埃易隔經年面忽聽車音喜不勝才氣讓君高百尺
酒腸寬我過三升薄寒坐轉霜天月往事談深雪屋燈

記取鳳城西北頰竹床相對兩如僧

得家信

遲滯經三載平安報一門開從迴雁磧寄自擣衣村身
賤歸難料家貧恨每吞兩親猶未葬先計了兒婚

荅衛源與先生見寄之什

蘇門仙籍在長嘯出風塵頗怪高賢意偏憐失路人宦
情歸後澹詩境老來真靈藥如堪斲吾將就結隣

西溟竹垞同遊房山余不及踐約口占送之

斜陽聯騎去影落好山中古寺尋碑入幽泉撥葉通勝
遊關俗念閒趣就詩翁隔斷桑乾水黃沙白草風

哭朱大司空六首

忽得彌留信驚疑欲問天更誰承絕學

公為紫陽裔孫

忍遽奪

名賢存歿真關運行藏好美年茫茫國西路白日迫虞

淵

正色持朝議從人指異同不聞廷辨語真有大臣風局
定閒居後名高薄讓中肯留毫髮恨物論久方公

罷官賓客盛不署下邳門萬卷藏書第孤雲倚杖村履
聲今寂莫花氣舊網緼從此西州泪都銷醉後魂

衣褐初相見雲泥不啻過自蒙公賞識一任俗譏訶才
退江花夢神傷薤露歌轉緣期許厚脈脈負慙多

悵斷西山路曾陪兩度游雲峯竒入夏泉味冷經秋酒
許王弘送詩同魏野留篋中高唱在讀罷泪交流

天不留耆舊人皆惜老成風流餘畫像官號定銘旌年
譜門生輯文編國史評恬侯恭謹似重望起家聲

禹尚基屬題水村圖小照二首

縈青繚白埭西東門掩檀欒倒影中千片白鷗波萬頃
釣竿只占一絲風

朝衫猶絆未歸人畫裏鬚眉淡有神已辦青鞵青筇笠
問渠何路出黃塵

聞周青士淮南訃信

苦口勸君去筋骸看頗強祇云當暮齒不合久他鄉病
忽中途得神翻永訣傷餘生還自歎歸計尚茫茫

楊耑木來都出示涿州道上見懷八絕句次韻

奉荅

荒程野店暗戎戎，灰洞連雲小驛通。辛苦琉璃河畔路，

一天冰雪兩征鴻。

時與家德尹偕行

短衣篤速又重來，雙眼摩挲試一開。拚得故人驚黑瘦，

斷腸誰似賀方回。

舊來書札屢相存，難遣離愁閱曉昏。今夕和歌燕市裏，

不知何事尚銷魂。

南園一醉夢難消，新指陂塘丈五高。迸落客中知己淚，

刺梅花下長蓬蒿。

乙丑初夏同建來司空南園之約今司空已下世

蛾眉里族艷同時錦瑟，雖工俗豈知比似孝標還曠達。

上年歸燕併無詩。

指端木乙丑禮闈報罷事

橫草才情好在無髑髏猶記血模糊征南賓客今淪落
怕展藍田射虎圖

冰泮西沽喚繫師

春初送司馬公南歸

久留生計太無奇白駒只

合逃空谷一食場苗便繫維

行期爲爾少遲留南酒新香出竹筩楊柳作鞭花壓帽

此時去住兩無愁

時余方計南歸

喜德尹至都即用道中見寄韻八首

花南硯北屋西東先築都荒想像中此意十年應共惜

一般根蒂兩飄蓬

別是尋常會却奇鶴鴒沙外影離離可憐半世爲兄弟
兩度相逢在路岐

敬業堂詩集卷八
三
敝裘寒色國西門刮面西風太少恩不是雪花如掌大
豈知姜被果奇温

匪莪蓼蓼感伊蒿此際方知父母勞三尺孤墳何日築
敢將門戶委兒曹

添丁從小絕堪哀抱向花前得幾回
弟去年始得一子名騶虞可但

生兒憐絡秀有人椎髻望歸來

少賤長貧那得辭浪游真愧作男兒只除中酒聯吟夕
不似長安下第時

八齡工賦庾肩吾五十能詩高達夫勿羨早成輕晚就
天心原不薄窮途

三畝原爲種稻留私逋官稅苦難酬翻因細悉家中事

從此思家又起頭

曉出西華門逢吳震一

九陌紛紛路向岐毛驢馱客立多時一冬風力今朝橫
吹折街南賣酒旗

盆梅同唐實君揆愷功賦

以下戊辰
初春作

不借東風力全憑火候催夢隨馳驛到香自渡江來物
性違移植人情惜早開草堂留老榦冰雪戰春回

探春花再索實君和

本是丁香種先從臘尾開一叢疑積雪繁蕊欲欺梅南
客今初見新詩悶強裁君看凡草木猶帶好春來

水仙次韻

梳額檀心韻青裙縞袂姿洛波迎宓女越網得西施用義

山詩中語脈脈含情遠盈盈欲語遲月中曾解珮爭許俗人

知

壽大司馬梁玉立先生四首

兩朝元老出名賢身繫安危四十年同日蒼生多屬目

向來黃髮少隨肩金甌社稷銷兵裏玉斧關河聚米前

如此皇圖資坐鎮何煩書案更籌邊

萬騎塵清萬里風殿廷次第與論功兒童往往知司馬

貢使年年問相公排闥山光迎劍戟傷簾燭燄吐長虹

太平別有經綸業無用陰符置篋中

盛事雕橋紀一時壽槐千歲尚虬枝贊皇世業平泉記

樞密新堂畫錦詩無價鼎彝歸賞識有人書畫乞題辭
官高依舊風流在不愧人稱海鶴姿

尺五天低韋杜城文星長傍禁垣明每因餘論諳前事

雅有虛懷接後生閣上麒麟圖早識座中鸚鵡賦難成

謂丙寅春公召飲事從今一上生申頌感激曾蒙記姓名

送黼皇姪出宰大浦

青溪一條水發源自白嶽千里赴海豐楮龕為鎖鑰余

家赭山口子住齊雲脚阮巷南北分裴眷東西拓雖云

支派別夫豈淵源各先朝際盛隆中葉顯儒學煌煌兩

開府先中丞京兆事業恍如昨外吏實起家致身上臺閣綿

延君子澤十世不為薄汝叔秦望州牧賢掛冠去節笻

吾宗老觀察

王望伯

近亦返丘壑坐惜數年來衰宗正中

落家聲望子振有若水救涸子才洵超群氣勢竚騰躍
胸藏五千卷試手高第博簇簇又發硯團團弩張曠謂
當雙兩翅一舉上寥廓何期赴南宮六度困東郭季子
金婁罄東方米徒索僂首作選人初心豈所樂之官嶺
海外道遠塵漠漠臨分當贈言古人例有作與君屬關
切聊爲舉其略邑宰職親民顧名思義托如何千百輩
疾苦視隔膜寧多才地違或少寬嚴酌子今抱經濟枳
棘棲鸞鶴百弊不足釐餘情故綽綽潮州本善地貢賦
雜海錯大浦居其間頗自異頗劇兵餘奈凋瘵戶口十
半削往者征南師驚駭到鮫鱉剪除兇暴盡政虎尚餘

虐仁人行撫綏所亟在民瘼大僚恣指揮小吏承唯諾
省事先省心自然破根格人散訟庭閒官清條教約蒲
鞭併可去况乃痛敲扑譬如百孔滄難得萬金藥徐徐
養元氣稍稍起積弱民風旣已佳土物矧不惡榕樹清
陰留佛桑紅饒著文禽好毛羽中有羅浮雀漿分荔子
甘茶代檳郎嚼珊瑚及珠琲過眼風掃穽方將寶清名
未肯計衰橐從來賢達意定不俗吏若屈指三年期還
朝報循卓

送沈譽生之任靖安

江西是我曾遊處風土從君一一誇郭外有山皆種竹
春來無路不迷花商船晚鬧臨溪碓官課先輸曬網家

此去始知魚米賤十年應悔住京華

寄壽潛江朱石戶先生

半肩華髮倚孤筇萬卷奇書貯短篷日出茶烟吟甫里
雨來巾角墊林宗魚標隔竹參差見酒旆穿花次第逢
如許風期誰獨占白雲高護丈人峰

桐城錢田間先生相遇都門出詩集見示中有
丁酉寓長干寺投贈先君子七律一章距今已
三十二年先君下世且十一年矣感而次韻

敝廬風雨十年扃南北身隨敗葉零先爻漸如星落落
殘宵愁對火熒熒詩貪記憶關心讀話到蒼涼制淚聽
莫問生涯流轉跡賤貧何事不曾經

附田間先生原作

古寺秋聲夜不扃
客星幾點共飄零
鐘殘隔院禪香
換雨曉長廊塔火
熒市隱定從江左
覓雅歌還在越
中聽道人入道無
他術只講床頭一
卷經

敬業堂詩集卷八